

# Una

## Sulat I Pablo Tun Ta Mga Taga Corinto

### Una Basan

Corinto tō tuu dakál asta tuu ágkabantug lunsud sayyan tun ta banuwa ka Acaya. Ni banuwa ka Acaya ánggadanan Grecia áknganni. Tō lunsud ka Corinto madani tun ta dagat, asta ágsódóan katō marapung mga barko tikud tun ta ássa-ássa mga banuwa. Purisu ágkabantug tō Corinto tingód katō mga ágbarigyaán dan asta tingód katō mga madat áglumun dan. Ágpangadapán dan tō marapung mga ágmanaman.

Marapung tō mga Judio na igóddō tun ta Corinto. Duwán mga simbaan dan asta ágtuman dan katō mga ágkémun dan tingód katō kapangadap dan.

Ni sulat tun ta mga ágpampamaké tun ta Corinto igsulat i Pablo. Sikandin tō taraimu ka tulda ébō duwán magamit din. Kada Sabado ágsadun sikandin tun ta simbaan ka mga Judio ébō mulit-ulit tingód ki Jesu-Cristo. Igulit-ulitan din pagsik tō mga Griego. Tō gó tō iglumu i Pablo tun ta Corinto dalám ka sábbad ámmé ágtángngà. Purisu duwán mga taga Corinto na igpamaké ki Cristo. Mabasa ni tun ta libro na igsulat i Lucas, Lumu 18:1-18.

Pángnga katō kapanó i Pablo tikud tun ta Corinto, idugangan tō mga manubù na igpamaké ki Cristo. Asal igpapulé dan. Purisu duwán mga manubù na igpasadun tun ki Pablo tun ta Efeso ébō piddán tō sulat dan tun kandin. Iginà dan kandin tingód katō igapulan dan. Tō itanggap i Pablo tō sulat dan, igsulat sikandin kani Una Corinto tun kandan ébō taban din tō langun insà dan.

Tikud tun ta tagnà kapitulo sippang tun ta kapitulo 11, igsulat si Pablo tingód katō mga madat áglumun dan. Tikud tun ta kapitulo 12 sippang tun ta kapitulo 16, igsulat sikandin tingód katō mga gasa na ágbággén katō Ugis Espiritu.

**1** <sup>1</sup>Ni gó tō sulat tikud áknami na si Pablo asta si Sostenes na kataladi ta. Igsalinna katō Manama asta igimuwa na apostoles i Jesu-Cristo.

<sup>2</sup>Ni gó tō sulat ku tun ta langun ágpampamaké diyan ta Corinto. Igsalin

kó katô Manama ébô imun kó na mga sakup din. Igtanggap kó ka Manama na nángngà tun ta saruwan din ukit katô kasábbad yu tun ki Jesu-Cristo, asta isakup kó tun ta grupo katô langun ágpangadap katô Áglangngagán ta na si Jesu-Cristo tun ta duma mga lugar, su sikandin tó Áglangngagán katô langun ta.

<sup>3</sup>Mòlà pa ka matanggap yu tó kédu asta tó kasunayan tikud tun ta Manama na Ámmà ta asta ki Jesu-Cristo na Áglangngagán.

### Igpasalamat si Pablo

<sup>4</sup>Inalayunna ágpasalamat tun ta Manama tingód katô madigár mga gasa na igbággé din ákniyu ukit katô kasábbad yu tun ki Jesu-Cristo, <sup>5</sup>su tuu kó igtabangan ka Manama ébô makagpát kó asta makólit-ólit kó katô langun ka kabánnalan. <sup>6</sup>Ituman ni magunawa katô isóddóran yu na bánnal gó tó mga igtinurú dé tingód ki Cristo. <sup>7</sup>Purisu di kó gó ágkakulangan katô gasa na tikud tun ta langit na igbággé ka Manama róggun gangat kó katô kalónód katô Áglangngagán ta na si Jesu-Cristo. <sup>8</sup>Si Cristo tó pasarig katô kapamaké yu sippang tun ta katapuriyan ébô di kó mabuyas ka dumunggú tó álló ka rumuud tó Áglangngagán ta na si Jesu-Cristo. <sup>9</sup>Ágkasarigan tó Manama na igtawar ákniyu ébô pasábbad kó tun ta Batà din na si Jesu-Cristo na Áglangngagán ta.

### Kailangan pasábbadé tó mga ágpamaké ki Cristo

<sup>10</sup>Na, mga kataladi, su ágsuguánnánna katô Áglangngagán ta na si Jesu-Cristo, ágpédu-éduwa ákniyu ébô pasábbadé tó langun yu asta liliyan yu tó kapassaé. Pasábbadé kó tun ta mga panámdám yu asta tun ta gugtunán yu. <sup>11</sup>Mga kataladi ku, igkagi ku ni su duwán tun ta pamilya i Cloe na igulit kanak na duwán ágpapulé diyan ákniyu. <sup>12</sup>Kakalyag ku na kagin ku ni. Duwán tun ákniyu na ágkagi, “Si Pablo tó igpasakupan ku,” asta ágkagi tó duma, “Si Apolos tó igpasakupan ku.” Duwán pô gó mga ágkagi, “Si Pedro tó igpasakupan ku,” asta ágkagi tó duma, “Si Cristo tó igpasakupan ku.” <sup>13</sup>Ánnà madigár ni! Itángngà-tángngà kanné si Cristo? Ánnà gó sakán tó igpansalan tun ta krus para ákniyu! Ándà kó gó bunyagi ukit katô kapasakup yu kanak!

<sup>14</sup>Ágpasalammatta tun ta Manama su ándà tun ákniyu na igbunyagan ku, asal si Crispo asta si Gayo dád tó igbunyagan ku. <sup>15</sup>Purisu ándà makakagi na igbunyagan dan ukit katô kapasakup dan kanak. <sup>16</sup>(Igbunyagan ku kanné pagsik si Estefanas asta tó pamilya din, asal ándà dán duma na ipanámdámman ku na igbunyagan ku.) <sup>17</sup>Ándà a papiddi i Cristo ébô munyagga, asal igpapidda ikandin ébô mulit-ulitta katô Madigár Gulitán. Tó igulit-ulitta, ándà ku gamiti tó mapandé mga kagi agó ándà ágpulusán katô ágtinuruán ku tingód katô kamatayan i Cristo tun ta krus.

**Si Cristo tō ágpasóddór na matulus asta mapandé tō Manama**

<sup>18</sup>Para katō mga manubù na ágsadun tun ta ágsupakanan, tō ágtinuruán tingód katō kamatayan i Cristo tun ta krus kangulággan dád tun kandan. Asal para áknita na igtábbus, tō ágtinuruán tingód katō kamatayan i Cristo tō ágpasóddór na makatábbus tō Manama. <sup>19</sup>Su mà katō kagi ka Manama,

“Andaán ku tō kapandayan ka mga mapandé,  
asta pasóddórán ku na ándà ágpulusán katō kénagpát ka mga duwán kakatigan.”<sup>a</sup>

<sup>20</sup>Imánnu tō mga mapandé? Imánnu tō mga taratinurù ka sugù? Imánnu tō mga katig ginsà-insà áknganni? Igpasóddór dán ka Manama na kangulággan dád tō kapandayan ka mga manubù nit banuwa.

<sup>21</sup>Su tingód katō kapandayan ka Manama, di makakilala tō mga manubù kandin ukit dád katō kandan kapandayan. Asal kakalyag ka Manama na tábbusán din tō langun manubù na mamaké kandin ukit katō kólit-ólit ka Madigár Gulitán, agad tō mga géllé kandin, kéman dan ka kangulággan dád ni. <sup>22</sup>Tō mga Judio di mamaké ka ándà kasalábbuan na kitanán dan, asta tō mga Griego géllé katō di nángngà tun ta kandan kapandayan. <sup>23</sup>Asal sikami, gulit-ulit ké tingód ki Cristo na igpansalan tun ta krus. Gélléyan ni katō mga Judio, asta ágkagi tō mga ánnà Judio na kangulággan dád ni. <sup>24</sup>Asal tō langun katō igtawar ka Manama, agad Judio ó ánnà Judio, gulit-ulitan ta sikandan tingód ki Cristo na ágpasóddór na matulus asta mapandé tō Manama. <sup>25</sup>Su tō igimu ka Manama na ágpanámdámmán dan na kangulággan dád, tō gó tō tuu pa mapandé ka tandingán katō kapandayan ka mga manubù, asta tō igimu ka Manama na ágpanámdámmán dan na kalómétan dád, tō gó tō tuu pa mabákkár ka tandingán katō kabákkárran ka mga manubù.

<sup>26</sup>Mga kataladi, panámdám yu tō ákniyu kóddô tō ándà kó pa tawari ka Manama. Tun ta panámdám ka duma mga manubù, tagsábbadé dád gó tun ákniyu tō mga mapandé, tagsábbadé dád gó tun ákniyu tō mga ágpangulu, asta tagsábbadé dád gó tun ákniyu tō mga pamilya na ágkangadanan. <sup>27</sup>Asal igsalin gó ka Manama tō mga manubù na igpanámdám katō duma mga manubù na kangulággan dád nit banuwa ta ébô payayyaán tō mga mapandé, asta igsalin ka Manama tō igpanámdám katō mga duma na malómét dád ébô payayyaán din tō mga mabákkár. <sup>28</sup>Igsalin ka Manama tō mga ágkayù-ayuan asta tō mga ándà kaduwánnan na ágpanámdámmán na ándà ágpulusán nit banuwa ta ébô andaán din tō ágpanámdámmán na duwán ágkailanganán. <sup>29</sup>Tō gó tō igimu ka Manama ébô ándà palang manubù na makapadadurung

<sup>a</sup> 1:19 Isaias 29:14

tun ta saruwan ka Manama. <sup>30</sup>Tikud tun ta kakalyag ka Manama igimu kó na mga sakup i Jesu-Cristo na igpasóddór áknita katô kapandayan ka Manama. Ukit ki Cristo igtanggap ki ka Manama na nángngà tun ta saruwan din. Si Cristo tô igpalinis asta igpógis áknita, asta sikandin tô igtábbus áknita tikud tun ta salà. <sup>31</sup>Purisu tuman kó kani sugù na igsulat tun ta kagi ka Manama,

“Tô malyag padadurung,  
kailangan padadurungán din tô igimu katô Áglangngagán.”<sup>b</sup>

### Kamatayan i Cristo tun ta krus

**2** <sup>1</sup>Mga kataladi, tô igsadunna diyán ákniyu ébô mulit-ulitta katô kabánnalan na igpasóddór dán ka Manama, ándà ku gamiti tô mga madalám kagi ó tô madalám kapandayan. <sup>2</sup>Su igplanowa na ándà dán ássa na ulit-ulitán ku ákniyu asal si Jesu-Cristo dád asta tô kapansal kandin tun ta krus. <sup>3</sup>Tô diyanna pa duma ákniyu, duwán kalómétan ku, ágpangárkarránna asta ágkállasánna. <sup>4</sup>Tô igtinurù a ákniyu asta tô igulit-ulitta, ándà ku gamiti tô mapandé mga kagi ébô mapid kó dád, asal igpasóddór katô Ugis Espiritu na bánnal gó tô igkagi ku ukit katô katulusan din <sup>5</sup>ébô mamaké kó ánnà ukit ka kapandayan ka manubù, asal ukit katô katulusan ka Manama.

### Kapandayan ka Manama

<sup>6</sup>Na, atin ka ágdutunna ta mga manubù na masarig é kapamaké dan ka Manama, kapandayan tô ágtinuruán ku, asal ni kapandayan ánnà tikud tun ta mga manubù nit banuwa áknganni ó tikud tun ta mga ágpangulun nit banuwa áknganni na mandà ka dì madugé. <sup>7</sup>Asal ni kapandayan ka Manama na ágkagin ku, ni gó tô inallás sayyan asal igpasóddór din dán, su tô ándà pa imuwi ka Manama ni banuwa, igplano din na mému ki iring ki Cristo. <sup>8</sup>Tô mga ágpangulun nit banuwa áknganni ándà ikagpát kani plano ka Manama. Su atin ka inagpáttan dan, ándà dan pád pansali tô ágkabantug Áglangngagán tun ta krus. <sup>9</sup>Asal mà katô kagi ka Manama na igsulat,

“Ándà gó manubù na ikakita, ikadinág, ó ikapanámdám katô mga igtaganà ka Manama para katô mga ágginawa kandin.”<sup>c</sup>

<sup>10</sup>Ni plano ka Manama igpasóddór dán áknita ukit katô Ugis Espiritu. Su tô langun-langun isóddóran katô Espiritu, asta igpakita din áknita tô ándà pa pakitayi katô Manama. <sup>11</sup>Iring áknita na mga manubù, ándà palang pakasóddór katô panámdám ka duma manubù, su kandin dád sarili tô pakasóddór kanan. Magunawa tun ta Manama, su ándà palang manubù na pakasóddór katô panámdám ka Manama, asal tô Ugis Espiritu

<sup>b</sup> 1:31 Jeremias 9:24    <sup>c</sup> 2:9 Isaias 64:4

dád ka Manama tô pakasóddór kanan. <sup>12</sup>Asal inagpáttan ta tô langun gasa na igbággé ka Manama áknita su sikita na mga ágpampamaké tô igbággayan ka Manama kani Ugis Espiritu. Purisu ánnà magunawa tô panámdám ta asta tô panámdám katô mga manubù nit banuwa.

<sup>13</sup>Purisu tô ágkagin dé tingód kani mga gasa na igbággé ka Manama, tô gó tô igtinurù áknami ánnà tikud tun ta kapandayan ka manubù, asal igtinurù katô Ugis Espiritu. Igpénagpát dé tô mga kabánnalan na igtinurù katô Ugis Espiritu tun ta mga manubù na duwán Ugis Espiritu tun kandan. <sup>14</sup>Asal tô mga manubù na ándà Ugis Espiritu ka Manama tun kandan di ágtanggap katô mga gasa na ágbággén katô Ugis Espiritu. Kéman dan ka kangulággan dád. Di dan ágpakagpát, su tô mga manubù na duwán Ugis Espiritu tun kandan, tô dád gó tô ágpakagpát kani. <sup>15</sup>Sikita na duwán Ugis Espiritu tô ágpakagpát kani langun. Asal di ki ágkagpáttan katô duma mga manubù. <sup>16</sup>Bánnal ni, su mà katô kagi ka Manama na igsulat,

“Ándà palang manubù na ikasóddór katô panámdám katô Áglangngagán!

Ándà palang manubù na makatinurù kandin!”<sup>d</sup>

Asal sikita na ágpampamaké tô ikagpát kani, su dini áknita tô panámdám i Cristo.

### Igpasaé tô mga ágpampamaké tun ta Corinto

**3** <sup>1</sup>Na, mga kataladi, tô igduma a ákniyu dángngan, ándà a ikatinurù ákniyu iring na mga manubù na ágtinuruan ku na ágkapánnuan katô Ugis Espiritu. Asal igtinurù a gó ákniyu iring na mga manubù na ágtuman katô ágkémun kani banuwa asta iring na mga gabatà pa tun ta kapamaké ki Cristo. <sup>2</sup>Purisu igtinurù ku ákniyu tô mababó dád, iring na gatas na ágpénámmán ka délák batà. Su iring kó na délák batà na di pa pakakan, ándà ku tinurui ákniyu tô madalám su di yu pa kagpáttan tô madalám mga ágtinuruán. Agad áknganni di kó pa gó pakagpát. <sup>3</sup>Su sippang áknganni, ágkapid kó pa katô madat mga kakalyag yu. Ágpéngaé kó pa asta ágpapulé kó. Ni iglumu yu igpasóddór na ágkapid kó pa katô madat mga kakalyag yu. Tô áglumun yu iring pô gó katô mga manubù na ándà pa pamaké katô Áglangngagán ta. <sup>4</sup>Tun ákniyu duwán mga ágkagi, “Si Pablo tô igpasakupan ku,” asta duwán mga duma na ágkagi, “Si Apolos tô igpasakupan ku.” Purisu tô áglumun yu iring katô mga manubù na ándà pamaké ki Cristo.

<sup>5</sup>Manan ka si Apolos asta si Pablo tô igpabantug yu? Mga ágsuguánnán ké dád ka Manama na iggamit din ébô mamaké kó ki Cristo. Igtuman dé dád tô igpalumu katô Áglangngagán áknami, <sup>6</sup>su sakán tô igpamula,

<sup>d</sup> 2:16 Isaias 40:13

si Apolos tō igbisbis, asal Manama gó tō igpatubù. <sup>7</sup>Ánnà mabantug tō ágpamula asta tō ágbisbis. Asal Manama gó tō tuu pa mabantug ka tandingán katō langun, su sikandin tō ágpatubù. <sup>8</sup>Magunawa tō ágdantulán katō ágpamula asta katō ágbisbis. Duwán pulusán na bággén ka Manama tun ta tagsábbad-sábbad kandan tingód katō linumuwan dan. <sup>9</sup>Sakán asta si Apolos tō ágsuguánnán ka Manama, asta ágpatabangé ké tun ta lumu dé. Iring kó na kinamát ka Manama.

Iring kó na balé ka Manama. <sup>10</sup>Ukit katō gasa na igbággé ka Manama kanak, igimuwa katō ágpónsadanán iring na katig taraimu ka balé. Áknganni duwán mga duma na ágpanayun ágpatindág katō balé tun ta bówwó kani ágpónsadanán. Asal kailangan tuu gó piyà-piyaan tō lumu katō tagsábbad-sábbad manubù na áglumu. <sup>11</sup>Dì mému ka taguán tō ássa ágpónsadanán, su duwán dán ágpónsadanán na igtagù na si Jesu-Cristo. <sup>12</sup>Tō mga ággamítán ka mga manubù na ágpatindág katō balé iring na mga bulawan, mapputì bulawan, asta mga batu na dakál é lagà, ó iring na kayu, karan asta ragami. <sup>13</sup>Asal ka dumunggù tō tapuri álló ka karuud, kitanán ka ándin é igimu katō tagsábbad-sábbad manubù. Tō igimu katō langun manubù pókitán tun ta apuy ébò kitanán ka magóbbó ó dì. <sup>14</sup>Atin ka dì magóbbó tō igimu ka manubù, duwán pulusán na tanggapán din. <sup>15</sup>Asal ka magóbbó tō igimu ka manubù, ándà pulusán na tanggapán din. Makaluwà sikandin iring katō manubù na ikaluwà tikud tun ta balé na magóbbó.

<sup>16</sup>Kailangan kasóddóran yu na langun yu na ágpampamaké iring na templo<sup>e</sup> katō Manama asta góddóan kó katō Ugis Espiritu ka Manama. <sup>17</sup>Atin ka duwán manubù na dumadat katō templo ka Manama, dadattan sikandin ka Manama, su ugis tō templo ka Manama, asta sikiyu tō iring na templo din.

<sup>18</sup>Yakó áglimbung katō ákniyu sarili! Atin ka ágpanámdám tō manubù tun ákniyu na duwán kapandayan din nit banuwa, kailangan iwaán din tō kapandayan kani banuwa ébò mému sikandin mapandé tun ta saruwan ka Manama. <sup>19</sup>Su tō ágpanámdámmán ta na kapandayan ka mga manubù nit banuwa, kangulággan dád tun ta saruwan ka Manama. Su mà katō kagi ka Manama na igsulat,

“Ággután ka Manama tō mapandé mga manubù ukit katō kandan kalimbung.”<sup>f</sup>

<sup>20</sup>Asta mà pagsik katō kagi ka Manama na igsulat,

“Isóddóran katō Áglangngagán na ándà ágpulusán katō ágpanámdámmán ka mapandé mga manubù.”<sup>g</sup>

<sup>21</sup>Purisu yakó ágpadadurung tingód katō iglumu ka manubù. Su igbággé ka Manama tō langun tun ákniyu, <sup>22</sup>agad sakán, si Apolos asta si Pedro,

<sup>e</sup> 3:16 Templo tō ágpangadapanan ka Manama. <sup>f</sup> 3:19 Job 5:13 <sup>g</sup> 3:20 Salmo 94:11

agad ni banuwa ta, agad tō ágkalumu áknganni asta tō dumunggù, agad tō kantayan yu asta tō kamatayan. Dutun ákniyu ni langun, <sup>23</sup>asta sikiyu dutun ki Cristo, asta si Cristo dutun ta Manama.

### Áglumun katō mga apostoles

**4** <sup>1</sup>Na, panámdám yu na sikami tō mga ágsuguánán i Cristo asta ágsarigan ké ka Manama ébō pasóddórán dé tō kabánnalan din na ándà pasóddóri sayyan. <sup>2</sup>Na, kailangan ágkasarigan gō tō manubù na duwán igsarig tun kandin.

<sup>3</sup>Para kanak, agad ándin tō ágpanámdámán yu ó дума mga manubù tingód katō áglumun ku, tógón din. Agad sakán, diya ágkagi ka nángngà ó ò nángngà tō katuman ku katō sugù ka Manama kanak. <sup>4</sup>Agad ándà sóddór ku ka duwán iglumu ku na ò nángngà, asal tógón din, su tō Áglangngagán dád gō tō makaruud kanak asta kumagi ka nángngà ó ò nángngà tō áglumun ku. <sup>5</sup>Purisu yakó ágruud ka дума manubù ka ándà pa dunggù tō timpo ka lumónód tō Áglangngagán. Su sikandin gō tō pakita katō mga gállássán ta asta mga ágpanámdámán ta. Durungán ka Manama tō tagsábbad-sábbad manubù na nángngà gō tō kandin linumuwan.

<sup>6</sup>Mga kataladi, iggamit ku ni kanak sarili asta si Apolos iring na panunggingiran para katō ákniyu kadigárran ébō kagpáttan yu tō kóbadan kani ágkagin, “Yakó ágsuwé tikud tun ta mga sugù tun ta kagi ka Manama.” Purisu yakó ágkagi na sábbad áknami tō tuu madigár tun ta дума. <sup>7</sup>Manan ka ágpanámdám kó na tuu kó madigár ka tandingán katō дума? Ándin tō tun ákniyu na ándà bággéyi katō Manama? Su tikud tun ta Manama tō langun, manan ka ágpdadurung kó kani iring na ánnà gasa din ákniyu?

<sup>8</sup>Kéman yu ka ándà dán kulang katō ágkailanganán yu! Kéman yu ka ágkaduwánnan kó! Inému kód na mga hari, agad sikami ándà pa! Mólà pa ka ágpangulu kód ébō makapangulu ké pagsik дума ákniyu! <sup>9</sup>Tō panámdám ku na sikami na mga apostoles tō igimu ka Manama na tuu mabbabà é kamanubuan. Inéring ké na mga igpriso na igruudan asta matayan. Inému ké ángngisiyan ka langun nit banuwa, agad langun panaligan asta langun manubù. <sup>10</sup>Su ágtinurù ké tingód ki Cristo, duwán ágkagi na ágkangulág ké, asal ágpanámdám kó na mapandé kó su igpasakup kód tun ki Cristo. Malómét ké kun, asal panámdám yu na masarig kó. Ò ké ágdurungán ka дума mga manubù, asal ágdurungán kó ikandan. <sup>11</sup>Sippang gō ni álló ni, ágballusán ké asta ágkatákkangan ké, ágkakulangan ké ka umpak, ágpasakitan ké, asta ágpanó-panó ké na ándà góddóan dé. <sup>12</sup>Áglumu ké ébō duwán magasto dé. Atin ka duwán ágbuyas-buyas áknami, ágpamuyù ké ka Manama na duwán kédu din kandan. Atin ka girrayatan ké, ágtiis ké dád. <sup>13</sup>Atin ka ágbuyasán ké, madigár tō ágtaban dé. Agad áknganni inéring ké

dád na ussu su ágpayayyaán ké ka duma mga manubù nit banuwa. Tun ta panámdám ka mga duma, sikami tô tuu ágkayù-ayuan katô langun.

<sup>14</sup>Ándà a sulat kani ákniyu ébô payayyaán kó, asal kakalyag ku na katinuruan kó iring na mga gabatà ku na ágginawaan ku. <sup>15</sup>Su agad marapung tô duma mga taratinurù tun ákniyu tingód ki Cristo, asal sakán dád gó tô iring na ámmà yu ukit katô kapamaké yu. Su tô igulit-ulitta katô Madigár Gulitán tun ákniyu dángngan, ikéring kó na mga gabatà ku ukit katô kapamaké yu ki Jesu-Cristo. <sup>16</sup>Purisu su iringnga na ámmà yu, ágpédu-éduwa ákniyu na miring kó katô kanak ágkémun. <sup>17</sup>Tô gó tô igpasadun ku si Timoteo diyán ákniyu. Iring na kanak batà sikandin su ágginawaan ku, asta ágkasarigan sikandin tun ta kapamaké katô Áglangngagán. Pasampáttán din ákniyu tô mga ágkémun ku tun ta kapamaké ku ki Cristo, su magunawa tô ágkémun na ágtinuruán ku tun ta langun simbaan ka mga ágpampamaké.

<sup>18</sup>Duwán dán tun ákniyu na ágpallayat-layat, su kéman dan ka diya lumónód puman tun ákniyu. <sup>19</sup>Asal ka duwán kakalyag katô Áglangngagán, di dán madugé madunna diyán ákniyu. Atin ka madunna, ahaán ku ka duwán katulusan ka Manama tun ta mga manubù na ágpallayat-layat ukit ka kagi. <sup>20</sup>Su di nángngà ka ágkagi-kagi dád tô mga manubù na igpasakup dan tun ta pagpangulu ka Manama, asal kailangan pasóddórán dan na bánnal dan na mga sakup ka Manama ukit katô mga áglumun dan ukit katô katulusan ka Manama. <sup>21</sup>Ka dumunggù a diyán ákniyu, ándin tô kakalyag yu na lumun ku? Sumupakka ákniyu, ó pakitanán ku ákniyu tô ginawa ku asta kédu ku?

### Madat lumu katô sábbad taga Corinto

**5** <sup>1</sup>Idinág ku gó na duwán tun ákniyu na áglumu ka madat na di mému lumun agad tun ta mga manubù na di ágpamaké. Idinág ku na duwán mama tun ákniyu na áglayuk katô sawa katô ámmà din. <sup>2</sup>Agad madat tô áglumun din, asal ágpdadurung kó pô gó! Kailangan maranu kó gó, asta péwaán yu tikud tun ta grupo yu tô mama na iglumu kani. <sup>3-4</sup>Agad ándà a diyán ákniyu, asal tun ta panámdám ku diyanna ákniyu. Su ágsuguánnánna katô Áglangngagán na si Jesus, igruudan kud tô iglumu kani salà. Purisu atin ka palimudé kó, panámdám yu iring na diyanna ákniyu. Asta tingód katô kapasakup yu tun ta Áglangngagán ta na si Jesus, <sup>5</sup>bággé yu tô manubù tun ki Maibuyan para dadattan tô lawa din ébô matábbus sikandin tun ta tapuri álló ka rumuud tô Áglangngagán na si Jesus.

<sup>6</sup>Di nángngà tô kapadadurung yu. Iring na ándà kó pa ikasóddór na, “Atin ka baláttán tô pagpatubù ka pan tun ta dakál harina, tumubù tô langun harina na igmasa.”<sup>h</sup> <sup>7</sup>Purisu péwà yu gó ni iglumu ka salà tikud

<sup>h</sup> 5:6 Tingód katô pagpatubù ka pan, ahaán tô Mateo 13:33; asta Lucas 13:20-21. Ágkátin tô salà tun ta duma mga manubù, iring na pagpatubù ka pan na ágpapubù katô harina na igmasa.



tun ta grupo yu ébô mému kó gó puman na malinis tun ta saruwan ka Manama.<sup>i</sup> Tô kabánnalan, igpasinsiyaan tô salà yu asta ikéring kó katò pan na ándà patubù, su si Cristo tô igmatayan ébô mullas áknita. Sikandin tô iring na karnero na giyón ka mga Judio dalám katò Pista ka Kalabé. <sup>8</sup>Purisu atin ka ágpalamudé ki, kailangan kadayawan ki ánnà ukit ka kalumu ta ka salà, iring na pan na duwán pagpatubù, asal ukit ka kalumu ta ka malinis asta bánnal, iring na pan na ándà pagpatubù.

<sup>9</sup>Tun ta una surat ku ákniyu, igkagiya na di mému ka dumuma kó katò mga manubù na áglumu ka madat. <sup>10</sup>Asal tô kóbadan katò kagi ku na ánnà ébô liliyan yu tô mga manubù na di ágpamaké na áglumu ka madat, asta tô mga ágkasabuan, tô mga tulisan, ó tô mga ágpangadap katò ágmanaman. Atin ka sikandan tô liliyan yu, kailangan miwà kó gó tikud kani banuwa. <sup>11</sup>Asal kakalyag ku na tô mga ágpampamaké gó tô liliyan yu ka áglayuk dan katò ánnà kandan sawa ó duma, ágkasabuan dan, ágpangadap dan katò ágmanaman, ágbuyas-buyas dan, marag dan ágkalasing, asta áglapas dan katò mga sugù. Di mému agad kuman kó dád duma kandan.

<sup>12-13</sup>Di mému ka sakán tô rumuud katò mga di ágpamaké, su Manama gó tô rumuud kandan. Asal kailangan ruudan yu tô mga ágpampamaké na áglumu ka madat, su mà katò kagi ka Manama na igsulat,

“Péwà yu tô madat manubù tikud tun ta grupo yu.”<sup>j</sup>

### Kósay katò mga ágpampamaké

**6** <sup>1</sup>Atin ka dimandan yu tô kataladi, di mému ka pósayán yu katò huwes na di ágpamaké ka Manama. Kailangan pósayán yu katò mga ágpampamaké. <sup>2</sup>Iring na ándà sóddór yu na tun ta katapuriyan mga álló, sikita na ágpampamaké tô musay katò langun manubù nit banuwa. Purisu atin ka sikiyu tô musay katò langun-langun, manan ka di kó pakósay katò mga délák dád samuk áknganni? <sup>3</sup>Iring na ilingawan yu na sikita tô rumuud katò mga panaligan. Purisu mému gó ka sikiyu tô musay katò mga manubù nit banuwa! <sup>4</sup>Purisu atin ka dumimanda kó, di mému ka pósayán yu katò masalà-salà manubù na di ágrespetowan ka mga ágpampamaké. <sup>5</sup>Nángngà ka kayyaan kó! Manan ka ándà palang manubù diyan ákniyu na nángngà tô kapandayan din ébô musay? <sup>6</sup>Agad mataladi kó tun ta kapamaké, asal madat tô áglumun yu su ágpadimandaé kó, asta tô gó tô áglumun yu tun ta tubang katò mga di ágpamaké.

<sup>7</sup>Ukit ka kapadimandaé yu, igpasóddór yu na tô langun yu italu. Madigár pa ka pabayaán yu dád tô áglumu ka madat asta tô áglimbung

<sup>i</sup> 5:7 Kada ámmé tô ándà pa tigkané tô Pista Ka Kalabé, áglinis tô mga Judio katò balé dan ébô iwaán dan tô pagpatubù ka pan. Tô iglumu ka salà igpéring i Pablo katò pagpatubù ka pan na iwaán tikud tun ta balé. <sup>j</sup> 5:12-13 Deuteronomio 17:7.

ákniyu. <sup>8</sup>Asal tō áglumun yu, sikiyu gó baling tō áglumu ka madat asta tō áglimbung agad tun ta mga kataladi yu.

<sup>9</sup>Iring na ándà yu kasóddóri na tō mga áglumu ka madat di masakup tun ta pagpangulu ka Manama. Yakó áglimbung katō ákniyu sarili! Tō mga áglayuk katō ánnà kandan sawa ó duma, tō mga ágpangadap katō ágmanaman, tō mga áglibug, asta tō mga áglayuk katō unawa din gamama ó gabayi, di dan gó masakup tun ta pagpangulu ka Manama. <sup>10</sup>Tō mga takón, tō mga ágkasabuan, tō mga ágpangkalasing, tō mga ágbuyas-buyas, asta tō mga áglimbung, di dan gó masakup tun ta pagpangulu ka Manama. <sup>11</sup>Duwán gó tun ákniyu na iglumu iring kani dāngngan. Asal áknganni igurasan dán tō mga salà yu, inému kó d na mga gabatà ka Manama, asta igtanggap ka Manama na nángngà kó d tun ta saruwan din ukit ka iglumu katō Áglangngagán na si Jesu-Cristo asta katō Ugis Espiritu ka Manama ta.

#### Góddóan tō lawa ta katō Ugis Espiritu

<sup>12</sup>Idinág yu basì ni ágkagin, “Agad ándin tō kakalyag ku, mému ka lumun ku tō langun.” Bánnal ni, asal ánnà langun kani tō duwán ágpulusán. Agad mému ka lumun ku tō langun, diya gó malyag ka állangánna katō áglumun ku. <sup>13</sup>Atin ka duwán kumagi, “Tō ágkakan para katō gátták, asta tō gátták para katō ágkakan.” Bánnal ni, asal tun ta tapuri álló, andaán gó ka Manama tō gátták asta tō ágkakan. Ni lawa ta ánnà gó igimu ébô lumayuk ki katō ánnà áknita sawa ó duma. Asal igimu ni lawa ta ébô makatuman ki katō kakalyag ka Áglangngagán, asta sikandin gó tō ágpangulu kani lawa ta. <sup>14</sup>Ukit katō katulusan ka Manama, iganté din puman tō Áglangngagán, asta tō áknita lawa pagsik tō antén puman ka Manama tun ta tapuri álló ukit katō katulusan din.

<sup>15</sup>Iring na ilingawan yu na tō lawa yu iring na bahin tun ta lawa i Cristo. Su si Cristo tō tigatun kani lawa yu, di gó mému ka pasábbadán yu tō lawa yu tun ta madat bayi!<sup>k</sup> Di gó mému ni! <sup>16</sup>Iring na ándà sóddór yu kani. Atin ka lumayuk tō mama tun ta madat bayi, tō lawa dan mému gó iring na sábbad dád lawa. Su mà katō kagi ka Manama na igsulat, “Tō duwa dan mému dán sábbad.”<sup>l</sup>

<sup>17</sup>Asal tō igpasakup tun ta Áglangngagán, sikandin asta tō Áglangngagán mému sábbad.

<sup>18</sup>Purisu yakó áglayuk katō ánnà ákniyu sawa ó duma. Liliyi yu tō mga salà iring kani. Tuu gó madat, su tō duma mga salà ándà labut katō lawa, asal ka palayuké tō ánnà taladuma, tō gó tō salà na pakadadat katō sarili lawa. <sup>19</sup>Iring na ándà sóddór yu na tō lawa yu iring na templo na góddóan katō Ugis Espiritu na igbággé ka Manama ákniyu. Purisu ánnà

<sup>k</sup> 6:15 Tō madat bayi ágbarigyà katō kandin lawa. <sup>l</sup> 6:16 Genesis 2:24

dán gó ákniyu tô lawa yu. <sup>20</sup>Igtigatun kód ka Manama su igbayadan kó ikandin asta igtábbus kó gó ukit katô iglumu i Cristo. Purisu kailangan durungán yu tô Manama ukit katô lawa yu.

### Tô kapakalyagé

**7** <sup>1</sup>Na, ni gó tô taba ku tingód katô mga insà na igsulat yu kanak. Óó, madigár pád ka dì kumalyag tô manubù. <sup>2</sup>Asal su marapung tô mga áglayuk katô ánnà kandan sawa ó duma, madigár gó ka duwán sawa katô tagsábbad-sábbad gamama, asta duwán duma katô tagsábbad-sábbad gabayi. <sup>3</sup>Tô mama kailangan tumuman katô kakalyag ka sawa din tingód katô áglumun ka taladuma, asta tô bayi pagsik kailangan tumuman katô kakalyag ka duma din tingód katô áglumun ka taladuma. <sup>4</sup>Su tô lawa ka sawa tingód dán katô kakalyag ka duma din, asta tô lawa ka mama tingód dán pagsik katô kakalyag ka sawa din. <sup>5</sup>Purisu yakó géllé na lumayuk katô ákniyu sawa ó duma. Asal mému ka pasábbadé kó na duwán timpo na dì kó pa palayuké ébô makatuganul kó dumasal.<sup>m</sup> Asal pángnga katô timpo ka kadasal yu, palayuké kó puman. Purisu dì kó matintal i Maibuyan ka dì kó makapáttud. <sup>6</sup>Ni igkagi ku ánnà sugù ku ákniyu, asal ka duwán kakalyag yu na tumanán, mému ni kanak. <sup>7</sup>Kakalyag ku pád na mólà pa ka tô langun makéring kanak na ándà sawa. Asal ánnà magunawa tô langun ta na ágpampamaké su ássa-ássa tô gasa na igbággé ka Manama tun ta tagsábbad-sábbad áknita.

<sup>8</sup>Na, ni gó tô kagin ku tun ta mga ándà pa sawa ó duma, asta tun ta mga balu. Tuu pa madigár ka manayun kó na ándà sawa ó duma yu iring kanak. <sup>9</sup>Asal ka dì kó makatiis, kailangan kumalyag kó baling ébô dì kó ágkapid katô kénit katô kébág ka lawa yu.

<sup>10-11</sup>Na, sikiyu na mga taladuma, duwán gó sugù ku ákniyu. Ni sugù ánnà tikud kanak, asal tikud tun ta Áglangngagán. Kailangan dì dumiyà tô sawa katô kandin duma, asta kailangan dì sumugban tô mama katô kandin sawa. Asal ka duwán sawa na dumiyà katô kandin duma, kailangan inalayun sikandin móddô na ándà duma din. Mému ka lumónód sikandin tun ta kandin duma.

<sup>12</sup>Duwán sugù ku tun ta mga duma manubù. Kanak dád ni sugù ni, su ánnà tikud tun ta Áglangngagán. Tô mama na ágpamaké na duwán kandin sawa na dì ágpamaké, atin ka kadayawan tô sawa din na dumuma pa kandin, dì mému ka sumugban katô kandin sawa. <sup>13</sup>Asta tô bayi na ágpamaké na duwán kandin duma na dì ágpamaké, atin ka kadayawan tô duma din na dumuma pa kandin, dì mému ka sumugban katô kandin duma. <sup>14</sup>Su tô mama na dì ágpamaké igbággayan dán katô Manama ka madigár ukit katô kandin sawa na ágpamaké. Asta tô bayi na dì

<sup>m</sup> 7:5 Makatuganul kó dumasal, ó makabággé kó ka timpo tun ta kadasal.

ágpamaké igbággayan dán katô Manama ka madigár ukit katô kandin duma na ágpamaké. Su atin ka ánnà bánnal ni, tô kandan mga gabatà di bággayan ka Manama ka madigár. Asal tô kabánnalan, igbággayan dan dán katô Manama ka madigár.

<sup>15</sup>Asal ka dumiyà tô ákníyu sawa ó duma na di ágpamaké, mému ka nunugan yu sikandin. Yakó yu gawidi. Asal madigár ka pasábbadé tô mga taladuma, su igtawar kó katô Manama ébô duwán kasunayan. <sup>16</sup>Su sikiyu na ágpamaké, atin ka di kó sumuwé, makému kó makapid katô ákníyu sawa ó duma na di ágpamaké ébô matábbus dan.

### Kailangan panayunán tô madigár kóddô yu

<sup>17</sup>Agad sumugban tô mga di ágpamaké, tô tagsábbad-sábbad na ágpamaké, kailangan panayunán yu tô madigár kóddô iring na igbággé katô Áglangngagán tô timpo na igtawar tô Manama ákníyu. Ni gó tô ágtinuruán ku tun ta mga ágpampamaké tun ta langun banuwa. <sup>18</sup>Na, sikiyu na mga Judio gamama, atin ka igtupuwan kó asta isakup kó tun ta mga Judio tô igtawar tô Manama ákníyu, yakó giring katô mga ánnà Judio na ándà pa katupuwi. Asta sikiyu na mga ánnà Judio gamama, atin ka ándà kó pa katupuwi tô igtawar tô Manama ákníyu, yakó giring katô Judio ukit ka kapatupu yu, <sup>19</sup>su agad igtupuwan kó ó ándà kó katupuwi, tógón din su di dán ágkailanganán tun ta saruwan ka Manama. Asal tô ágkailanganán ta, tô dád gó tô katuman ta katô mga sugù ka Manama áknita. <sup>20</sup>Purisu manayun gó tô tagsábbad-sábbad tun ta áknita kóddô tô timpo na igtawar tô Manama áknita.

<sup>21</sup>Atin ka állang ka tô igtawar tô Manama áknikó, tógón din. Yaka ágkatanaan tingód kani. Asal ka mému ka makaluwà tikud tun ta kallang áknikó, luwà ka gó. <sup>22</sup>Tô állang na igtawar ka Manama ébô pasábbad tun ta Áglangngagán, tó gó tó igpaluwà dán katô Áglangngagán tikud tun ta salà. Asta tó ánnà állang na igtawar ka Manama, tó gó tó inému dán na állang i Cristo. <sup>23</sup>Igtigatun kó ka Manama su itábbus kó gó ukit katô iglumu i Cristo. Purisu yakó ágpallang tun ta duma manubù. <sup>24</sup>Mga kataladi, tó tagsábbad-sábbad manubù na igpasábbad tun ta Manama kailangan manayun katô madigár kóddô iring katô igbággé katô Manama ákníyu tó timpo ka katawar din ákníyu.

### Tô mga ándà pa sawa ó duma, asta mga balu

<sup>25</sup>Na, ni gó tó taba ku katô insà na igsulat yu kanak tingód katô mga ándà pa sawa ó duma. Ándà sugù na ulitán ku kandan tikud tun ta Áglangngagán. Asal ukit ka kédu din kanak, ágkasariganna asta ni gó tó tinurù ku.

<sup>26</sup>Tingód katô mga kahirapan áknganni, tuu pa madigár ka manayun ki dád katô áknita kóddô. <sup>27</sup>Purisu atin ka duwán dán sawa nu, yaka

nu sikandin ágdiyai. Atin ka ándà pa sawa nu, yakad ágkalyag. <sup>28</sup>Asal ka kumalyag ka, ánnà salà ni. Atin ka kumalyag tô daraga, ánnà salà ni. Igkagiya na mému ka di kó pád kumalyag su kakalyag ku na di kó kadungguan katô mga kahirapan na dumunggù tun ta mga taladuma.

<sup>29</sup>Na, mga kataladi, kakalyag ku na kasóddóran yu ni. Masig dán dumunggù tô tapuri álló. Purisu tikud áknganni, tô tuu ágkailanganán katô mga gamama na duwán sawa, ánnà tingód katô kapataladumaé yu. <sup>30</sup>Di dán ágkailanganán ka maranu kó asta kadayawan kó. Di dán ágkailanganán ka duwán bállin yu asta ándà inatunán yu. <sup>31</sup>Tô mga manubù na ággamit katô mga impán nit banuwa, di mému ka mawiid dan kani, su di madugé mandà ni banuwa asta tô langun kani.

<sup>32</sup>Kakalyag ku na makalili kó pád katô mga makatana ákniyu nit banuwa. Tun ta mga ágpampamaké, tô mama na ándà sawa ágkasasó dád tingód katô mga ágpalumun katô Áglangngagán ébô kadayawan sikandin. <sup>33</sup>Asal tô mama na duwán sawa ágkasasó tingód katô mga ágkémun kani banuwa ébô kadayawan tô kandin sawa. <sup>34</sup>Purisu ágduwa-duwa tô kandin panámdám. Iring gó kanan tô mga gabayi na ágpamaké. Tô bayi na ándà duma mému bággén din tô tibuk kantayan din tun ta Áglangngagán. Asal tô bayi na duwán duma ágkasasó tingód katô mga ágkémun kani banuwa ébô kadayawan tô kandin duma.

<sup>35</sup>Igkagi ku ni ébô katabangan kó, ánnà ébô kadalangan kó. Kakalyag ku na nángngà tô áglumun yu tun ta saruwan ka Manama, asta makatuman kó katô kakalyag katô Áglangngagán tikud tun ta tibuk pusung yu.

<sup>36</sup>Na, tingód katô mga talabanà, atin ka manámdám tô mama na duwán basi malumu din tun ta kandin banà na di nángngà su di pa sikandin makapáttud katô kandin ágriyun, ka manámdám sikandin na madigár pa ka kumalyag dan dán, mému ka tumanán din tô kakalyag din. Madigár ka kumalyag dan. Ánnà salà ni. <sup>37</sup>Asal ka manámdám tô sábbad mama na di pa kumalyag katô banà din su makapáttud pa sikandin katô ágriyun din asta di pa ágkailanganán na kumalyag dan, nángngà tô kandin kapókit. <sup>38</sup>Purisu madigár tô lumun ka mama na kumalyag katô kandin banà. Asal madigár pa tô kapókit ka mama na di pa kumalyag.

<sup>39</sup>Kailangan pasábbadé tô taladuma róggun manté pa tô duwa dan. Asal ka maté tô mama, mému dán kumalyag puman tô bayi balu. Asal tô kalyagan din kailangan ágpamaké katô Áglangngagán. <sup>40</sup>Asal tun ta panámdám ku, tuu pa kadayawan tô bayi balu ka di puman sikandin kumalyag. Tô gó tô ágkagin ku, asta ágpanámdámna na igtádduanna gó katô Ugis Espiritu ka Manama.

### Ágkakan na ágbággén tun ta mga ágmanaman

**8** <sup>1</sup>Na, tingód katô ágkakan na ágbággén tun ta mga ágmanaman, ka mému kannán ta ó di mému. Isóddóran ta na duwán kapandayan

katô langun ta tingód kani. Asal ágpdadurung dád gó tô mga manubù na kéman dan ka sikandan dád gó tô duwán kapandayan. Tuu pa madigár ka ágpaginawaé ki, su ni gó ni makatabang áknita. <sup>2</sup>Atin ka ágpanámdám tô manubù na isóddóran din gó tô langun, kulang pô gó tô kapandayan din. <sup>3</sup>Asal tô manubù na ágginawa katô Manama, tô gó tô isakup ka Manama.

<sup>4</sup>Na, tingód katô kakan ta katô ágkakan na igbággé tun ta mga ágmanaman, isóddóran ta na ánnà bánnal manama tô ágbággayan dan, su sábbad dád gó tô Manama. <sup>5</sup>Ágkagi gó tô duma mga manubù na duwán mga manama tun ta langit asta nit banuwa. Agad marapung tô ágtawarán ka mga duma manubù na “manama” asta “áglangngagán,” <sup>6</sup>asal para áknita na ágpampamaké, isóddóran ta na sábbad dád gó tô Manama, asta sikandin tô Ámmà ta. Sikandin tô igimu katô langun, asta igimu ki ikandin ébò dumurung ki kandin. Isóddóran ta na sábbad dád gó tô Áglangngagán na si Jesu-Cristo. Ukit kandin igimu ka Manama tô langun, asta ukit kandin igbággayan ki katô kantayan.

<sup>7</sup>Agad sábbad dád tô Manama, asal duwán mga ágpampamaké na ándà ikasóddór kani kabánnalan. Su dángngan tô ándà dan pa pamaké, inayadan dan gó tô mga ágmanaman, asta sippang áknganni, atin ka ágkan dan katô ágkakan na igbággé tun ta mga ágmanaman, tô panámdám dan iring na ágpangadapán dan gó tô mga ágmanaman. Purisu ágpanámdám dan na makasalà dan ukit katô kakan dan kani. <sup>8</sup>Asal di ki gó makapadani tun ta Manama ukit katô ágkakan ta. Agad kuman ki ó di ki kuman, ándà gó palang ágpulusán ta tun ta saruwan ka Manama tingód kani.

<sup>9</sup>Asal agad mému kó kuman katô ágkakan na igbággé tun ta mga ágmanaman, banté kó agó tô lumun yu mému gunayan na makasalà tô mga malómét é kapamaké. <sup>10</sup>Agad isóddóran yu ni kabánnalan, atin ka kuman kó tun ta templo ka mga ágmanaman asta kitanán kó katô kadumaan yu na ágpamaké na ándà pa sóddór din kani kabánnalan, mapid basi sikandin kuman katô ágkakan na igbággé tun ta mga ágmanaman, agad tun ta panámdám din na salà ni. <sup>11</sup>Purisu ukit katô kabánnalan na isóddóran yu, kadattan tô malómét é kapamaké din agad sikandin tô kataladi yu asta inaté si Cristo para kandin. <sup>12</sup>Atin ka ukit katô áglumun yu, mapid na makasalà tô mga kataladi yu asta kadattan tô panámdám dan na ándà sóddór ka kabánnalan, makasalà kó gó ki Cristo. <sup>13</sup>Purisu atin ka makasalà tô kataladi ku ukit katô kakan ku ka ágkakan, diya gó kuman kanan ébò di sikandin makasalà ukit kanak.

### Ágkémun katô mga apostoles

**9** <sup>1</sup>Agad sakán, mému ka tumanán ku tô agad ándin é kakalyag ku, su apostolessa na igkita gó ki Jesus na Áglangngagán ta,

asta sikiyu tô igpamaké kandin ukit katô iglumu ku. Purisu mému ka sumulatta kani ákniyu. <sup>2</sup>Agad duwán mga дума manubù na kéman dan ka ánnà a apostoles, asal sikiyu tô ágpakita na bánnalla apostoles katô Áglangngagán.

<sup>3</sup>Atin ka duwán mga manubù na di ágbánnal na apostolessa, ni gó tô taban ku kandan. <sup>4</sup>Su apostoles ké, mému ké gó pakannán katô mga manubù na ágtinuruan dé. <sup>5</sup>Mému ka patákkássán dé tô sawa na ágpamaké, su tô gó tô áglumun katô дума mga apostoles, mga kataladi katô Áglangngagán, asta ki Pedro. <sup>6</sup>Yakó ágpanámdám na sikami dád si Bernabe tô kailangan lumumu ébò duwán magamit dé. <sup>7</sup>Ándà palang sundalo na ágtandan gó katô kandin sarili. Ándà palang taralumun na di gó kuman ka buuy katô igpamula din. Ándà gó palang taradóppón ka mga kambing na di gó minám ka gatas katô ágtómmóngan din.

<sup>8</sup>Ni mga panunggiringan ku tikud tun ta kóddò ta, asal magunawa pagsik tô igsulat tun ta kagi ka Manama, <sup>9</sup>su duwán sugù ka Manama na igsulat i Moises sayyan, na mà din,

“Yakó ágpungus katô babbà ka baka na marik ka trigo ébò makakan.”<sup>n</sup>

Na, ánnà dád kadigárran ka mga baka tô ágpanámdámmán ka Manama, <sup>10</sup>su kakalyag ka Manama na sikami gó na mga taratinurù tô duwán ágpulusán.

Agad tô manubù na dumaro asta tô manubù na kumáttu, duwán ágpulusán na gimanan dan tun ta ágkátuwan. <sup>11</sup>Sikami na mga taratinurù, iring ké katô manubù na ágparámmas, su tô kabánnalan tingód katô Manama iring na igpamula dé diyan ákniyu. Purisu nángngà gó ka bággayan ké ikiyu katô mga ágkailanganán dé álló-álló. <sup>12</sup>Atin ka tô дума mga taratinurù mému tumanggap katô tabang yu kandan, sikami gó tô tuu pa makatanggap.

Agad mému ké pád tumanggap katô tabang tikud tun ákniyu, asal ándà palang igpamuyù dé. Agad ihirapan ké, asal ikatiis ké katô langun ébò di ágkadalangan tô kólit-ólit katô Madigár Gulitán tingód ki Cristo.

<sup>13</sup>Isóddóran yu na tô mga manubù na áglumu tun ta templo ka Judio, tikud tun ta templo tô ágkangayan dan ka ágkakan. Tô mga manubù na ággóbbò katô mga mannanap tun ta templo, duwán bahin dan katô mga mannanap na ágbággén tun ta Manama. <sup>14</sup>Iring kanan, igkagi tô Áglangngagán na tô mga gulit-ulit ka Madigár Gulitán, kailangan tanggapán dan tô kailanganán dan tikud tun ta mga manubù na gulitan dan.

<sup>15</sup>Asal ándà palang igpamuyù ku tikud tun ákniyu, asta ándà a gó sulat kani ébò bággayanna ikiyu. Bánnal ni kagin ku ákniyu. Tuu pa

<sup>n</sup> 9:9 Deuteronomio 25:4

madigár ka matéya ka tandingán katô katanggap ku ka tandan tingód katô kólit-ólit ku ka Madigár Gulitán. <sup>16</sup>Diya padadurung tingód katô kólit-ólit ku katô Madigár Gulitán, su igsugù a katô Manama. Dì mému ka dì ku tumanán, su ándà ágpulusán ku ka diya mulit-ulit katô Madigár Gulitán! <sup>17</sup>Atin ka gulit-ulitta su sakán tô igsalin katô áglumun ku, mému ka gangatan ku pád tô tandan. Asal ánnà sakán tô igsalin kani áglumun ku, su igsariganna ka Manama kani kólit-ólit ku. Purisu atin ka ágtumanán ku dád tô kanak lumu, <sup>18</sup>ándin tô gangatan ku? Tô ágpulusán ku tô kadayawan ku ukit ka kólit-ólit ku katô Madigár Gulitán na ándà a patandan. Agad mému ka pamuyuán ku tô tandan tun ta mga ágtinuruan ku, asal diya gó mamuyù.

<sup>19</sup>Agad ánnà a állang ka manubù, inémuwa iring na állang katô langun ka manubù ébô tuu pa marapung tô mapid ku tun ki Cristo. <sup>20</sup>Purisu atin ka ágdumaan ku tô mga Judio, ágtumanán ku tô mga ágkémun dan ébô mapid ku sikandan tun ki Cristo. Agad mému ka dì ku ágtumanán tô mga sugù i Moises<sup>o</sup> na ágtumanán katô mga Judio, ágtumanán ku gó ébô mapid ku tô mga Judio tun ki Cristo. <sup>21</sup>Atin ka ágdumaan ku tô mga ánnà Judio na dì ágtuman katô mga sugù na ágtumanán katô mga Judio, ágtumanán ku tô mga ágkémun katô mga ánnà Judio na dì ágtuman katô mga sugù na ágtumanán katô mga Judio ébô mapid ku sikandan tun ki Cristo. Ándà ku kagiyi na dì ku ágtumanán tô mga sugù ka Manama, su tô kabánnalan ágtumanna gó katô mga sugù i Cristo. <sup>22</sup>Ágpapunawan ku tô kanak sarili katô mga manubù na malómét pa tô kapamaké ébô mapid ku sikandan tun ki Cristo. Ágpapunawan ku tô kanak sarili katô langun manubù agad ándin tô ágkémun dan ébô ukit ka langun katô áglumun ku duwán gó tun kandan na matábbus. <sup>23</sup>Ni gó tô áglumun ku su kakalyag ku na tuu pa mabantug tô Madigár Gulitán tingód ki Cristo ébô masakuppa tun ta mga manubù na duwán ágpulusán tikud tun ta Madigár Gulitán.

<sup>24</sup>Isóddóran yu na tun ta ágpatónaé, agad marapung tô ágpalayuy, asal sábbad dád tô makatanggap katô ágpulusán.<sup>p</sup> Purisu panayun kó sarig ki Jesu-Cristo ébô makatanggap kó katô áknuyu ágpulusán. <sup>25</sup>Tô langun ágtaganà para malaguy, kailangan pakapáttud dan gó ébô tanggapán dan tô korona ka kapanaluwan, agad tô korona dan igimu dád tikud ka mga daun na sékót ágkalanás. Asal sikita na mga ágpampamaké, pakapáttud ki ébô tanggapán ta tô ágpulusán na ándà ágtamanán. <sup>26</sup>Purisu ágpabákkarra katô kapamaké ku iring katô manubù na ágpanayun ágpalayuy tun ta kapanaluwan. Ikéringnga katô manubù na ágbuksing na dì ágsuntuk tun ta

---

<sup>o</sup> 9:20 Manama tô igbággé katô mga sugù ki Moises, asta si Moises tô igbággé katô mga sugù tun ta mga rubbad i Israel. Purisu ágtawarán katô mga rubbad i Israel na mga sugù i Moises. <sup>p</sup> 9:24 Ágpulusán, ó ganti.



karamag su inalayun ágsugat katô gatuwan din. <sup>27</sup>Purisu ágpabákkárrán ku ni lawa ku asta ágtiissa agó ka mapángnga tô kólit-ólit ku katô mga duma, sakán baling tô di makatanggap katô ágpulusán tikud tun ta Manama.

### Yakó ágpangadap katô mga ágmanaman

**10** <sup>1</sup>Mga kataladi, kakalyag ku na sampáttán yu tô inému katô mga kamónaan ta na igtákkás ki Moises sayyan. Tô langun dan igdóppónan ka Manama tun ta siyung katô sagulapun din, asta igukit tô langun dan tun ta dalan na igimu ka Manama para kandan tun ta tángngaán katô Mallutù Dagat. <sup>2</sup>Ukit ka katákkás dan katô sagulapun asta kókit dan tun ta dagat, iring na igbunyagan tô langun dan ébô tumákkás dan ki Moises. <sup>3</sup>Tô langun dan igkan katô ágkakan na igbággé ka Manama kandan, <sup>4</sup>asta tô langun dan iginám katô wayig na igbággé ka Manama kandan. Igarus ka Manama tô wayig tikud tun ta Batu na igtákkás kandan, asta tô gó si Cristo. <sup>5</sup>Asal agad madigár tô tabang ka Manama kandan, ándà gó kadayawi tô Manama tingód katô karapungan dan. Purisu igmatayan din sikandan tun ta disyerto.<sup>q</sup>

<sup>6</sup>Na, ni langun na inému katô mga kamónaan ta, tô gó tô pasóddór para áknita ébô di ki kadigárran na lumumu ka madat iring kandan. <sup>7</sup>Yakó ágpangadap katô mga ágmanaman iring katô iglumu katô mga duma. Su mà katô kagi ka Manama na igsulat,

“Tô mga manubù igpalimudé, igkan, iginám, asta igsayó tun ta kapangadap dan katô mga ágmanaman.”<sup>r</sup>

<sup>8</sup>Kailangan di ki gó lumayuk katô ánnà áknita sawa ó duma iring katô mga kamónaan ta. Tô gó igsupakan dan ka Manama, asta inaté tô mga duwa pulù tállu mararan (23,000) dalám ka sábbad dád álló.<sup>s</sup> <sup>9</sup>Kailangan di ta gó kinnaman tô Áglangngagán iring katô mga duma. Tô gó igkagat dan ka mga áppuy asta inaté.<sup>t</sup> <sup>10</sup>Yakó ágburáng-buráng tun ta Manama iring katô mga duma. Tô gó igmatayan dan katô Panaligan ka Kamatayan na igpapid katô Manama.<sup>u</sup>

<sup>11</sup>Inému ni langun tun ta mga kamónaan ta ébô pasóddórán na supakan ka Manama tô mga áglumu ka madat. Igsulat tô inému kandan ébô mému tambag para áknita na mga manté tun ta katapuriyan.

<sup>12</sup>Purisu atin ka ágpanámdám kó na masarig dán gó tô kapamaké yu, banté kó agó makasalà kó. <sup>13</sup>Atin ka ágkinnaman kó, kailangan sampáttán yu na duwán duma mga manubù na igkinnaman iring ákniyu. Asal ágkasarigan tô Manama, asta di kó ikandin pókitán tun ta pagkinnam na sopra pa katô matiis yu. Su atin ka ágkinnaman kó, duwán pagsik kapókit na imun ka Manama ébô makaluwà kó asta makatiis kó.

<sup>q</sup> 10:5 Ahaán tô Numeros 14:16,29-30    <sup>r</sup> 10:7 Exodo 32:6    <sup>s</sup> 10:8 Ahaán tô Numeros 25:1-9    <sup>t</sup> 10:9 Ahaán tô Numeros 21:5-6    <sup>u</sup> 10:10 Ahaán tô Numeros 16:41-50

<sup>14</sup>Purisu mga ágginawaan ku, yakó gó ágpangadap katô mga ágmanaman. <sup>15</sup>Sikiyu na igsulatan ku, nangngà tō kapandayan yu ébô kagpáttan yu ni igkagi ku ákniyu. <sup>16</sup>Atin ka ágpalimudé ki ébô sampáttán ta tō kamatayan i Cristo tun ta krus, ni gó tō áglumun ta. Atin ka ginámman ta tō kopa na igpasalamatan ta tun ta Manama, pasábbad ki langun tun ta dipanug i Cristo. Atin ka ágtáppik-táppikán ta asta ágkannán ta tō pan, pasábbad ki langun tun ta lawa i Cristo. <sup>17</sup>Sábbad dád abuk tō pan na ágkannán ta. Purisu agad marapung ki, pasábbadé ki.

<sup>18</sup>Panámdám yu gó tō mga Judio. Atin ka ágpalimudé dan tun ta templo asta ágkan dan katô ágkakan na ágbággén tun ta Manama, mapil dan tun ta kapangadap ka Manama. <sup>19</sup>Tō ágkagin ku na ándà ágpulusán katô mga ágmanaman asta ágkakan na ágbággén tun kandan. <sup>20</sup>Tō kóbadan katô igkagi ku na tō mga manubù na di ágpamaké katô Manama, atin ka ágbággé dan katô ágkakan, ánnà Manama tō ágbággayan dan, asal tō madat mga espiritu. Purisu kakalyag ku na ándà labut yu tun ta madat mga espiritu. <sup>21</sup>Di mému ka ginámman yu tō kopa katô Áglangngagán asta tō kopa katô madat mga espiritu. Di mému ka kuman kó tun ta ágkannanan katô Áglangngagán asta tun ta ágkannanan katô madat mga espiritu. <sup>22</sup>Atin ka tō gó tō lumun ta, masókó gó tō Áglangngagán. Kéman ta gó ka makaluwà ki tikud tun ta supak din.

<sup>23</sup>Idinág yu basì ni ágkagin, “Agad ándin tō kakalyag ta, mému ka lumun ta tō langun.” Bánnal ni, asal ánnà langun kani tō duwán ágpulusán. Agad mému ka lumun tō langun, asal ánnà langun kani tō makatabang. <sup>24</sup>Yakó yu ágpanámdámni tō kadigárran katô ákniyu dád sarili, asal panámdám yu tō kadigárran katô mga unawa yu.

<sup>25</sup>Agad ándin karneyi tō ágbarigyaán tun ta plasa, mému ka kannán yu tō langun. Yakó ginsà ka igbággé tun ta mga ágmanaman ébô di kadattan tō panámdám yu tingód kani. <sup>26</sup>Mému ka kannán yu tō langun su mà katô kagi ka Manama na igsulat,

“Tō Áglangngagán tō tigatun kani banuwa asta katô langun-langun.”<sup>v</sup>

<sup>27</sup>Atin ka pasadunán kó ka manubù na di ágpamaké tun ta balé din, asta malyag kó madun, nunug kó. Mému kannán yu tō langun ágbuwatán ákniyu. Yakó ginsà ka igbággé ni tun ta mga ágmanaman. Yakó ágkatanaan tingód kani. <sup>28</sup>Asal ka duwán ágkagi ákniyu na igbággé tō ágkakan tun ta mga ágmanaman, yakó yu ágkanni guné katô manubù na igkagi ákniyu, ébô di kadattan tō panámdám. <sup>29</sup>Su atin ka manayun kó kuman, agad di kadattan tō ákniyu panámdám, asal kadattan tō panámdám katô manubù na igkagi ákniyu.

Atin ka duwán minsà kanak, “Manan ka di nu tumanán tō ákniyó kakalyag guné katô panámdám ka duma manubù? <sup>30</sup>Atin ka pasalamatan

<sup>v</sup> 10:26 Salmo 24:1

nu tun ta Manama tō ágkakan, manan ka buyasán ka guné katō ágkakan na igpasalamatán nu?”

<sup>31</sup>Ni gó tō taba ku: Agad ándin tō lumun yu, agad kuman kó ó minám kó, lumu yu tō langun ébō mabantug tō Manama. <sup>32</sup>Yakó gó áglumu katō makapid ka duma manubù ébō makasalà, agad mga Judio ó agad mga ánnà Judio, agad mga ágpampamaké. <sup>33</sup>Iring kó gó kanak, su agad ándin tō áglumun ku, kakalyag ku na katabangan tō langun manubù. Dì ku ágpamasakán tō kanak kadigárran asal ágpamasakán ku tō kadigárran katō langun ébō matábbus dan.

**11** <sup>1</sup>Purisu iring kó kanak, iring katō kéring ku ki Cristo.

### Táddung ka ulu tun ta simbaan

<sup>2</sup>Na, madigár tō iglumu yu, su inalayun kó ágsampát katō iglumu ku asta igtinurù ku, asta ágtumanán yu tō mga ágkémun na igtinurù ku ákniyu. <sup>3</sup>Asal kakalyag ku na kasóddóran yu na si Cristo gó tō pangulu katō mga gamama, asta mama gó tō pangulu katō kandin sawa, asta Manama gó tō pangulu i Cristo. <sup>4</sup>Purisu atin ka ágdasal ó guliit-ulit tō mama katō kagi na igbággé ka Manama<sup>w</sup> na duwán táddung din, payayyaán din si Cristo na pangulu din. <sup>5</sup>Asal atin ka ágdasal ó guliit-ulit tō bayi katō kagi tikud tun ta Manama na ándà táddung din, payayyaán din tō duma din na ágpangulu kandin. Sikandin iring na bayi na igpaburu ébō payayyaán. <sup>6</sup>Su tō bayi na ándà táddung tun ta ulu din, madigár pa ka tampáddan din tō ulu din. Asal su kayyaan tō bayi ka tampáddan tō ulu din ó buruwan, kailangan duwán táddung din. <sup>7</sup>Asal mému ka ándà táddung katō mama na dumasal, su mama tō igimu ka Manama iring kandin ébō kitanán tō bantug ka Manama tun kandin. Asal bayi tō igimu ka Manama ébō mému mabantug tō mama. <sup>8</sup>Sayyan ánnà mama tō igkangé tikud tun ta bayi, asal bayi tō igkangé tikud tun ta mama. <sup>9</sup>Asta ánnà mama tō igimu para katō bayi, asal bayi tō igimu para katō mama. <sup>10</sup>Purisu kailangan duwán táddung katō bayi ébō agad tō mga panaligan ka Manama makasóddór na mama tō pangulu katō bayi. <sup>11</sup>Asal tun ta saruwan katō Áglangngagán, tō mama ágkailanganán ka bayi, asta tō bayi ágkailanganán ka mama. <sup>12</sup>Agad igimu ka Manama tō una bayi sayyan tikud tun ta mama, áknganni ipamasusu tō mga gamama tikud tun ta mga gabayi. Asal tō langun tikud gó tun ta Manama.

<sup>13</sup>Panámdám kó tingód kani. Dì gó nángngà ka dumasal tō bayi tun ta Manama na ándà táddung din. <sup>14</sup>Nángngà tō mama ka mabbabà tō ulu din, su dì ágrespetowan tō mama ka mallayat é ulu din iring na bayi. <sup>15</sup>Asal madigár sállággán tō bayi ka mallayat é ulu din, su igbággé ka

<sup>w</sup> 11:4 Kagi na igbággé ka Manama, ó propesiya.

Manama tō mallayat ulu tun ta bayi ébô katáddungan sikandin. <sup>16</sup>Asal ka duwán méllé kani igkagi ku, kumagiya dád na ándà ássa ágkémun dé agad tun ta karapungan ka mga simbaan ka Manama.

**Iyambung katô Áglangngagán**

*1Cor 11:17-34; Mat 26:1-29; Mar 14:22-25; Luc 22:14-20*

<sup>17</sup>Tun ta tinuruán ku pa ákniyu, diya dumurung ákniyu, su atin ka ágpalimudé kó, ánnà madigár tō áglumun yu, asal madat! <sup>18</sup>Una katô kagin ku ákniyu, igulitanna na tō ágpalimudé kó na mga ágpampamaké, ágpassa-assaé kó kun, asta panámdám ku na duwán kabánnalan tun ta idinág ku. <sup>19</sup>Asal madigár tō kapassa-assaé yu, su ukit kani, kasóddóran yu ka sadan tō nángngà tun ta saruwan ka Manama. <sup>20</sup>Atin ka ágpalimudé kó ágkan ébô sampáttán yu tō iyambung katô Áglangngagán, ánnà madigár tō áglumun yu, <sup>21</sup>su atin ka ágkan kó, di kó kun ágpangaté. Purisu duwán mga ágpamballusán asta duwán ágpangkatákkangan, asal tō mga duma ágpangkabássug asta ágpangkalasing. <sup>22</sup>Madat gó tō áglumun yu! Atin ka kakalyag yu na mabássug kó dád asta malasíng kó dád, yakó yu ágtumani tō kakalyag yu tun ta simbaan, su duwán gó mga balé yu. Asal ágkaringasaan yu tō mga ágpamaké ka Manama asta ágpayayyaán yu tō mga duwán délák makan. Ándin tō kagin ku ákniyu tingód kani áglumun yu? Durungán ku sikiyu? Dì gó!

<sup>23</sup>Tō igtinurù ku ákniyu dángngan, tō gó tō igtinurù katô Áglangngagán kanak. Na, tō dukilám tō ándà pa ámmátti tō Áglangngagán na si Jesus, igkangé din tō pan. <sup>24</sup>Igpasalamat sikandin, igtáppik-táppik din, asta igkagi sikandin, na mà din, “Ni gó tō lawa ku na bággén para ákniyu. Lumu yu ni ébô kasampáttanna ikiyu.” <sup>25</sup>Pángnga ka igkan sikandan, igkangé din pagsik tō kopa na duwán ginámmán, igpasalamatan din, asta igkagi, na mà din, “Ni ginámmán ni tō mantu kasabotan ukit katô dipanug ku na ulaán para ákniyu. Lumu yu ni ébô kasampáttanna ikiyu.”

<sup>26</sup>Sippang ka lumónód tō Áglangngagán, atin ka ágkan kó kani pan asta ginám kó kani ginámmán, ágpasóddóran yu na inaté sikandin para áknita. <sup>27</sup>Purisu atin ka ágkan kó kani pan katô Áglangngagán asta ginám kó kani ginámmán tun ta kopa din tun ta ánnà nángngà kapókit, makasalà kó tingód katô lawa asta dipanug katô Áglangngagán. <sup>28</sup>Purisu tō di kó pa kuman katô pan asta tō di kó pa minám katô ginámmán, tō tagsábbad-sábbad manubù kailangan minsà pa katô sarili din. <sup>29</sup>Su atin ka duwán kuman katô pan asta minám tun ta kopa na ándà dan panámdámmi tingód katô lawa katô Áglangngagán, ágpasupakan dan tō kandan sarili. <sup>30</sup>Tō gó tō gunayan na marapung tō mga igmalómét asta ibógókan tun ákniyu, asta duwán mga inaté. <sup>31</sup>Asal ka insaán ta gó tō sarili ta tō di ki pa kuman, ándà dán madat

dini áknita na supakan katô Áglangngagán. <sup>32</sup>Atin ka ágsupakan ki katô Áglangngagán, madigár ni su ágtinuruan ki ikandin ébô tun ta tapuri álló di ki mapil tun ta mga manubù na supakan din su ándà dan bánnal kandin.

<sup>33</sup>Purisu mga kataladi ku, atin ka ágpalmudé kó ágkan ébô sampáttán tó iyambung katô Áglangngagán, pangaté kó gó. <sup>34</sup>Atin ka duwán ágballusán na di pakapáttud, madigár ka muna pa sikandin kuman tun ta kandin balé ébô di kó supakan katô Áglangngagán tingód katô madat lumun yu ka palimudé kó. Na, tó duma mga insà yu kanak taban ku ka dumunggù a tun áknuyu.

### Mga gasa na ágbággén katô Ugis Espiritu

**12** <sup>1</sup>Na, mga kataladi, kakalyag ku na kagpáttan yu gó tó tingód katô mga gasa na ágbággén katô Ugis Espiritu. <sup>2</sup>Isóddóran yu na tó ándà kó pa pamaké katô Manama, inapid kó ébô mangadap kó katô mga ágmanaman na di pakakagi. <sup>3</sup>Purisu kakalyag ku na kasóddóran yu ni. Tó manubù na ágkapánnuan katô Ugis Espiritu ka Manama di makakagi katô madat tingód ki Jesus, asta tó manubù na di ágkapánnuan katô Ugis Espiritu di gó makakagi na si Jesus tó Áglangngagán.

<sup>4</sup>Na, agad ássa-ássa tó mga gasa, asal sábbad dád tó Ugis Espiritu na ágbággé kani langun. <sup>5</sup>Agad ássa-ássa tó mga kapókit ka kapatabangé ta, asal sábbad dád tó Áglangngagán na ágsugù áknita. <sup>6</sup>Agad ássa-ássa tó mga áglumun ta, asal sábbad dád tó Manama na áglumu ukit áknita. <sup>7</sup>Duwán ágbággén katô Ugis Espiritu tun ta tagsábbad-sábbad áknita ébô patabangé ki. <sup>8</sup>Duwán mga ágbággayan katô Ugis Espiritu ka gasa ébô mulit-ulit tingód katô kapandayan ka Manama, asta duwán duma mga ágbággayan katô Ugis Espiritu ka gasa ébô kagpáttan tó gulit-ulitán. <sup>9</sup>Duwán mga ágbággayan katô Ugis Espiritu ka dakál kapamaké tun ta Manama, asta duwán mga ágbággayan katô Ugis Espiritu ka gasa ébô makóli katô mga ágkabógókan. <sup>10</sup>Duwán mga ágbággayan katô Ugis Espiritu ka katulusan ébô makalumu katô mga kasalábbuan. Duwán mga ágbággayan ka gasa ébô mulit-ulit katô kagi na igbággé ka Manama tun kandan,<sup>x</sup> asta duwán mga ágbággayan ka gasa ébô makasóddór ka ágkagi tó manubù ukit katô Ugis Espiritu ó ánnà. Duwán mga ágbággayan ka gasa ébô makakagi ka ássa-ássa kinagiyan na ándà pa kasóddóri, asta duwán mga ágbággayan ka gasa ébô makóbad katô kinagiyan na ándà pa kasóddóri. <sup>11</sup>Asal Ugis Espiritu dád gó tó ágbággé kani langun, asta sikandin tó ágsalin ka ándin tó bággén din tun ta tagsábbad-sábbad áknita.

### Marapung tó mga bahin tun ta lawa

<sup>12</sup>Na, agad ássa-ássa tó mga bahin tun ta lawa ka manubù, asal isábbad tó langun tun ta sábbad dád lawa. Iring kani tó mga ágpampamaké, su

<sup>x</sup> 12:10 Kagi na igbággé ka Manama tun kandan, ó propesiya.

agad ássa-ássa tô mga gasa na igbággé tun ta tagsábbad-sábbad áknita, sikita tô sábbad dád lawa dutun ki Cristo. <sup>13</sup>Iring kanan, tô langun ta, agad Judio ó ánnà Judio, agad állang ó ánnà, igbunyagan ki langun tun ta sábbad dád Ugis Espiritu ébô mému ki na sábbad lawa, asta sábbad dád tô Ugis Espiritu na igbággé ka Manama tun ta langun ta.

<sup>14</sup>Agad sábbad dád tô lawa ka manubù, asal marapung tô mga bahin katô lawa. <sup>15</sup>Agad kumagi tô paa, “Su ánnà a bállad, ánnà a bahin tun ta lawa,” asal bahin pa ni katô lawa. <sup>16</sup>Agad kumagi tô talinga, “Su ánnà a mata, ánnà a bahin tun ta lawa,” asal bahin pa ni katô lawa. <sup>17</sup>Atin ka marag mata tô tibuk lawa, di makadinág tô lawa. Atin ka marag talinga tô tibuk lawa, di makapangadák tô lawa. <sup>18</sup>Asal tô kabánnalan, igtagù ka Manama tô ássa-ássa mga bahin tun ta lawa ukít katô kakalyag din. <sup>19</sup>Atin ka sábbad dád bahin tô tibuk lawa, di ni matawar na lawa. <sup>20</sup>Asal tô kabánnalan, marapung tô mga bahin tun ta lawa, asal sábbad dád gó tô lawa.

<sup>21</sup>Purisu tô mata di makakagi na ándà ágkailanganán katô bállad. Asta tô ulu di makakagi na ándà ágkailanganán katô paa. <sup>22</sup>Asal tô kabánnalan, agad tô mga bahin tun ta lawa na ágpanámdámmán ta na malómét, tô gó tô ágkailanganán. <sup>23</sup>Tô mga bahin tun ta lawa na ágpanámdámmán ta na ánnà tuu madigár, tô gó tô ágdóppónan ta. Asta tô mga bahin tun ta lawa na di mému ágkitanán, tô gó tô tambunan ka umpak. <sup>24</sup>Asal tô mga bahin tun ta lawa na mému kitanán, mému ka di ágtambunan. Igtagù ka Manama tô langun bahin tun ta lawa ta, asta ágdóppónan ta tô mga bahin na di mému ágkitanán. <sup>25</sup>Tô gó tô igimu ka Manama ébô di ágpasuwayé tô mga bahin tun ta lawa. Kakalyag din na patabangé tô langun. <sup>26</sup>Atin ka ágkasakitan tô sábbad bahin, ágriyu tô langun ka duma mga bahin. Atin ka ágdurungán tô sábbad bahin, ágkadayawan tô langun ka duma mga bahin.

<sup>27</sup>Ni gó tô kóbadan kani panunggiringan ku. Tô langun ta na ágpampamaké, sikita tô lawa na igtigatun i Cristo, asta tô tagsábbad-sábbad áknita tô mga bahin tun ta lawa din. <sup>28</sup>Tô tagsábbad-sábbad áknita na mga ágpampamaké tô igbággayan katô Manama ka gasa para katô palumun din. Una tô mga apostoles. Ikaduwa tô mga taraulit ka kagi na ágbággén ka Manama. Ikatállu tô mga taratinurù. Ágtalundug tô mga taraimu ka mga kasalábbuan, tô mga igbággayan ka katulusan ébô makóli katô mga ágkabógókan, tô mga taratabang, tô mga tarapangulu, asta tô ágkagi ka ássa-ássa kinagiyan na ándà dan pa kasóddóri. <sup>29</sup>Isóddóran yu gó na ánnà apostoles tô langun ta. Ánnà mga taraulit ó mga taratinurù tô langun ta. Ánnà taraimu katô mga kasalábbuan tô langun ta. <sup>30</sup>Ándà bággéyi tô langun ta ka gasa ébô makóli ki katô mga ágkabógókan. Di pakakagi tô langun ta katô ássa-ássa kinagiyan na ándà ta kasóddóri. Asta di pakóbad tô langun ta katô kinagiyan na ándà ta pa kasóddóri.

<sup>31</sup>Asal ággár-ággár kó ébô matanggap yu tikud tun ta Manama tô mga gasa na ágkailanganán yu. Asal tinuruán kud ákniyu tô tuu pa madigár.

### Tô ginawa

**13** <sup>1</sup>Agad makakagiya katô ássa-ássa mga kinagiyan ka manubù asta kinagiyan ka mga panaligan, asal ka ándà ginawa ku tun ta mga unawa ku, ándà maminág kanak su iringnga na dagingán ka agung na pakabingál. <sup>2</sup>Agad makólitta katô kagi tikud tun ta Manama, agad duwán igpasóddór ka Manama kanak na ándà din pasóddóri tun ta duma manubù, agad isóddóran ku tô langun kabánnalan, agad makapalinna katô pabungan ukit ka dakál kasarig ku ka Manama, asal ka ándà ginawa ku tun ta mga unawa ku, ándà gó palang ágpulusán kanak. <sup>3</sup>Agad bággén ku tô langun kaduwánnan ku tun ta mga unawa ku, agad mému kanak ka góbbón ni lawa ku, asal ka ándà ginawa ku tun ta duma mga manubù, ándà gó ágpulusán kanak.

<sup>4</sup>Ni gó tô áglumun ka manubù na ágginawa. Mallayat é ginawa din, asta madigár tô áglumun din tun ta mga unawa din. Di gingà asta di ágpadadurung. <sup>5</sup>Tô ágginawa di ágpallayat-layat. Di ágtuman katô kandin dád kakalyag. Di sékót ágkasókó. Di inalayun ágsampát katô salà ka duma mga manubù. <sup>6</sup>Tô ágginawa di ágkadayawan tingód katô madat mga linumuwan ka mga manubù, asal ágkadayawan tingód katô ágtuman ka kabánnalan. <sup>7</sup>Tô ágginawa inalayun ágtiis katô langun, inalayun ágbánnal katô madigár, giman katô madigár, asta inalayun mallayat é ginawa din agad ándin tô dumunggù kandin.

<sup>8</sup>Tô ginawa ándà gó ágtamanán. Asal duwán ágtamanán katô gasa ka kólit-ólit ka kagi na igbággé ka Manama tun ta mga manubù.<sup>y</sup> Duwán ágtamanán katô gasa ka kakagi katô ássa-ássa mga kinagiyan na ándà pa kasóddóri, asta duwán ágtamanán katô gasa ka kakatigan ta áknganni. <sup>9</sup>Su kulang pa tô kakatigan ta asta kulang pa tô kólit-ólit ta katô kagi na igbággé ka Manama áknita. <sup>10</sup>Asal ka dumunggù dán tô álló na mapángnga tô langun, mandà dán ni mga gasa na kulang.

<sup>11</sup>Tô délákka pa, iring gó na batà tô kakagi ku, tô kakalyag ku, asta tô panámdám ku. Asal su igdakál ad, igtananan kud tô ágkémun ka batà. <sup>12</sup>Áknganni tô isóddóran ta iring na bónnóng na kitanán tun ta pangalungan na di tuu matayyó. Asal dumunggù tô álló na matayyó tô kakita ta ki Jesu-Cristo. Áknganni délák dád tô isóddóran ku tingód katô Manama, asal duwán dumunggù álló na nángngà gó tô isóddóran ku, iring katô isóddóran katô Manama kanak.

<sup>13</sup>Purisu duwán tállu na di gó mandà ka ándà ágtamanán: tô kasarig, tô pagiman, asta tô ginawa. Asal tô ginawa tô tuu ágkailanganán.

<sup>y</sup> 13:8 Kagi na igbággé ka Manama tun ta mga manubù, ó propesiya.

**Kakagi katô kinagiyan na ándà pa kasóddóri**

**14** <sup>1</sup>Purisu ággár-ággár kó gó ébô makatuman kó guminawa. Asal ággár-ággár kó ébô kabággayan kó katô Ugis Espiritu ka mga gasa din. Ággár-ággári yu gó na kabággayan kó ka gasa katô kólit-ólit ka kagi na bággén ka Manama ákniyu. <sup>2</sup>Atin ka kumagi tó manubù katô kinagiyan na ándà din pa kasóddóri, ánnà duma mga manubù tó tóngkóán din, su dì dan pakagpát katô mga kagi din, asal Manama dád tó ágtóngkóán din. Ukit katô katulusan ka Ugis Espiritu ágkagin din tó tingód katô mga ándà kasóddóri ka duma manubù. <sup>3</sup>Asal ka mulit-ulit tó manubù katô kagi na bággén ka Manama kandin, tóngkóán din tó duma mga ágpampamaké ébô tuu dan kumasarig, ébô katabangan dan, asta ébô mórór dan. <sup>4</sup>Atin ka kumagi tó manubù katô kinagiyan na ándà din pa kasóddóri, kumasarig dád tó kandin sarili, asal ka mulit-ulit tó manubù ka kagi na bággén ka Manama kandin, kumasarig tó langun ágpampamaké na ágpalmudé. <sup>5</sup>Kakalyag ku pád na makakagi tó langun yu katô kinagiyan na ándà pa kasóddóri, asal tuu pa tó kakalyag ku na makólit-ólit kó katô kagi na bággén ka Manama ákniyu. Su tó kólit-ólit katô kagi na bággén ka Manama tuu ágkailanganán ka tandingán katô kakagi katô kinagiyan na ándà pa kasóddóri. Asal ka duwán makóbad katô kinagiyan na ándà pa kasóddóri, magunawa tó kólit-ólit ka kagi na bággén ka Manama asta tó kakagi katô kinagiyan na ándà pa kasóddóri ébô kumasarig tó kapamaké katô langun ki Cristo ukit ka kénagpát dan.

<sup>6</sup>Na, mga kataladi, atin ka madunna tun ákniyu, asta kumagiya dád katô kinagiyan na dì yu ágkagpáttan, ándà gó palang pulusán yu kanak. Kailangan duwán kagin ku ákniyu na igpasóddór ka Manama kanak, ó tinuruán ku tó kabánnalan, ó ulit-ulitán ku tó kagi na bággén ka Manama, ó duwán tinuruán ku ákniyu. <sup>7</sup>Agad tó dagingán katô mga ágpadingán na ándà kantayan, iring na plawta ó alpa, atin ka dì madigár tó kédup ó kapadaging ka mga nota, dì gó kasóddóran ka ándin tó tunada. <sup>8</sup>Agad idupán tó trumpeta ébô malimud tó mga sundalo, atin ka dì madigár tó kédup, ándà gó makataganà para katô gira. <sup>9</sup>Sikiyu pagsik, atin ka kumagi kó katô kinagiyan na dì ágkagpáttan, ándà pulusán katô mga maminág ákniyu, su iring na áglayapán dád ka karamag tó ágkagin yu. <sup>10</sup>Agad marapung gó tó ássa-ássa mga kinagiyan nit banuwa, asal duwán kóbadan katô tagsábbad-sábbad kinagiyan. <sup>11</sup>Asal ka dì ku kagpáttan tó kinagiyan ka manubù na tumóngkó kanak, asta dì din kagpáttan tó kinagiyan ku, ándà pulusán ku kandin, asta ándà pulusán din kanak. <sup>12</sup>Sikiyu pagsik, atin ka kakalyag yu na matanggap yu tó mga gasa na ágbággén katô Ugis Espiritu, ággár-ággár kó ébô matanggap yu tó gasa na makatabang katô mga ágpampamaké.

<sup>13</sup>Purisu tó manubù na makakagi katô kinagiyan na ándà din pa kasóddóri kailangan dumasal ébô bággayan sikandin ka gasa ébô móbad



din tō ágkagin din na di ágkagpáttan. <sup>14</sup>Róggun dumasalla, atin ka gamitán ku tō kinagiyan na ándà ku pa kasóddóri, agad dumasal tō kanak espiritu, tō kanak panámdám di makagpát. <sup>15</sup>Purisu ni gó tō lumun ku. Dumasalla asta kumanta a ukit katō kanak espiritu, asta dumasalla asta kumanta a ukit pagsik katō kanak panámdám. <sup>16</sup>Atin ka ágdurung ka katō Manama tun dád ta ákni kó espiritu, tō duma mga manubù na di pakagpát di makapil katō kadurung nu. Di dan makakagi na, “Amen,”<sup>z</sup> su ándà dan ikagpát katō kapasalamat nu tun ta Manama. <sup>17</sup>Agad tuu madigár tō kapasalamat nu tun ta Manama, asal ka di makagpát tō duma mga manubù, di ka gó makatabang kandan.

<sup>18</sup>Ágpasalamatta tun ta Manama su ándà duma manubù na makalampas kanak na ágkagi katō mga kinagiyan na ándà pa kasóddóri. <sup>19</sup>Asal atin ka ágpalmudé tō mga ágpampamaké, madigár pa ka kagin ku tō kagpáttan dan ébò katabangan dan. Agad ka lima dád mga kagi tō kagin ku na kagpáttan dan, tuu pa madigár ka tandingán katō mga mararan kagi ku na di dan kagpáttan.

<sup>20</sup>Mga kataladi, yakó ágpánámdám iring na batà. Péring kó na batà na ándà kinanuwan tingód katō madat linumuwan. Asal tun ta kagamit yu katō ákniyu panámdám, pasunnad kód ka panámdám yu. <sup>21</sup>Mà katō kagi ka Manama na igsulat,

“Agad kumagiya ukit katō mga manubù tikud tun ta ássa banuwa na ágkagi ka ássa-ássa mga kinagiyan, asal ni mga manubù na igsalin ku di gó maminág kanak, mà katō Áglangngagán.”<sup>a</sup>

<sup>22</sup>Purisu tō kakagi katō kinagiyan na ándà pa kasóddóri ánnà pató para katō mga ágpampamaké, asal pató para katō mga di ágpamaké. Asal tō kólit-ólit katō kagi na ágbággén ka Manama ánnà pató para katō mga di ágpamaké, asal pató para katō mga ágpampamaké.

<sup>23</sup>Purisu atin ka ágpalmudé kó ébò mangadap, asta kumagi tō langun yu katō mga kinagiyan na ándà yu pa kasóddóri, atin ka dumunggù tō mga ándà gasa ó di ágpamaké, makakagi dan gó na ágkangulág kó.

<sup>24</sup>Asal atin ka mulit-ulit kó katō kagi na ágbággén ka Manama ákniyu, ka dumunggù tō di ágpamaké ó ándà gasa, ukit katō langun na paminággán din makasóddór sikandin na masalà-salà asta ruudan sikandin ka Manama. <sup>25</sup>Ukit katō kagi ka Manama, pakitanán tō mga igállás din tun ta pusung din. Purisu lumingkóód sikandin ébò mangadap katō Manama, asta kumagi sikandin na duwán gó Manama diyan ákniyu.

### Tō kapangadap

<sup>26</sup>Na, mga kataladi, atin ka ágpalmudé kó ébò mangadap, ni gó tō nángngà lumun yu. Duwán kumanta. Duwán tuminurù. Duwán mulit-ulit

<sup>z</sup> 14:16 Tō kóbadan katō kagi Amen, “Mólà pa ka matuman ni.”    <sup>a</sup> 14:21 Isaias 28:11-12

katô kagi na ágbággén ka Manama. Duwán kumagi katô kinagiyan na ándà din pa kasóddóri, asta duwán pénagpát katô kóbadan kani. Ni gó tó lumun yu ébô kumasarig tó kapamaké katô langun yu. <sup>27</sup>Atin ka duwán kumagi katô kinagiyan na ándà din pa kasóddóri, mému dád ka duwa ó tállu dád tó kumagi. Dì dan padángngané na kumagi, asal tagsábbad-sábbad dan gó, asta kailangan duwán makóbad katô igkagi dan. <sup>28</sup>Asal ka ándà gó makóbad, kailangan tumagnáp dan asta kumagi dan dád gó tun ta kandan sarili, asta tun ta Manama. <sup>29</sup>Atin ka duwán tun ákniyu na katig mulit-ulit katô kagi na ágbággén ka Manama, mému ka kumagi tó duwa ó tállu dan, asta tó mga дума kailangan maminág katô kagin dan ébô kasóddóran ka bánnal tó ágkagin dan. <sup>30</sup>Atin ka duwán igunsad na tumanggap katô kagi na ágbággén ka Manama, kailangan tumagnáp tó una igkagi ébô makakagi tó дума manubù. <sup>31</sup>Mému kó langun makólit-ólit katô kagi na ágbággén ka Manama asal kailangan pasábbadé kó ébô makakatig tó langun yu asta kumabákkár tó kapamaké katô langun yu. <sup>32</sup>Tó gulit-ulit katô kagi na ágbággén ka Manama mému makapáttud katô kandin kakagi, <sup>33</sup>su kakalyag ka Manama na ándà samuk tun ta mga áglumun ta, asal kakalyag din na duwán kasunayan.

Na, tingód katô mga gabayi, ni gó tó áglumun katô mga ágpampamaké na ágpangadap ka Manama tun ta langun banuwa. <sup>34</sup>Atin ka ágpalimudé kó, kailangan tumagnáp asta maminág tó mga gabayi, su dì mému tun ta ágkémun ta ka kumagi dan. Dì mému ka mangulu tó mga gabayi tun ta mga gamama, su duwán sugù na igsulat tingód kanan tun ta mga sugù i Moises. <sup>35</sup>Atin ka duwán insà katô mga gabayi, madigár ka minsà dan katô kandan дума tun ta balé, su dì nángngà ka kumagi tó bayi tun ta kapalimudé katô mga ágpampamaké.

<sup>36</sup>Yakó géllé kani igtinurù ku, su ánnà gó sikiyu tó igtikudan katô kagi ka Manama! Ánnà dád gó sikiyu tó igbággayan ka kabánnalan! <sup>37</sup>Atin ka duwán tun ákniyu na ágpanámdám na gulit-ulit sikandin katô kagi na ágbággén ka Manama, asta igbággayan sikandin ka gasa tikud tun ta Ugis Espiritu, kasóddóran din na mga sugù gó katô Áglangngagán ni igsulat ku ákniyu. <sup>38</sup>Atin ka duwán méllé kani igsulat ku, élléyi yu sikandin.

<sup>39</sup>Purisu mga kataladi ku, ággár-ággár kó na mulit-ulit katô kagi na ágbággén ka Manama, asal yakó yu ágsapadi tó kakagi katô mga kinagiyan na ándà pa kasóddóri. <sup>40</sup>Kailangan nángngà tó langun ka áglumun yu asta ándà samuk.

### Tingód katô kantayan puman i Cristo

**15** <sup>1</sup>Na, mga kataladi ku, kakalyag ku na panámdámmán yu tó Madigár Gulitán na igulit-ulit ku ákniyu. Tó gó tó igtanggap yu asta ágsarigan yu sippang áknganni. <sup>2</sup>Ukit kani Madigár Gulitán,

matábbus kó ka inalayun kó mánnal. Asal ka dì kó manayun na mánnal, ándà pulusán katô kapamaké yu.

<sup>3</sup>Igtinurù ku ákniyu tô igtinurù pagsik kanak, asta ni gó tô tuu ágkailanganán. Inaté si Cristo ébô matábbus ki tikud tun ta salá ta, iring katô taganà igsulat tun ta kagi ka Manama.<sup>b</sup> <sup>4</sup>Iglábbáng tô lawa din, asta inanté puman sikandin tun ta ikatállu álló, iring katô taganà igsulat tun ta kagi ka Manama. <sup>5</sup>Igpakita sikandin una ki Pedro, asta igpakita pagsik tun ta sapulù duwa (12) mga apostoles. <sup>6</sup>Igpakita pagsik sikandin tun ta sobra ka lima gatus (500) mga kataladi na igpalimudé. Tô karapungan dan manté pa, asal tô mga duma inaté dán. <sup>7</sup>Na, igpakita sikandin ki Santiago asta tun ta langun apostoles.

<sup>8</sup>Sakán pagsik tô igpakitaan din tun ta katapuriyan, agad inéringnga na batá na ánnà pa nángngà pamasusun. <sup>9</sup>Sakán tô tuu mabbabà é kamanubuan ka tandingán katô langun apostoles. Dì pád nángngà ka tawarána na apostoles, su dángngan igirrayatan ku tô mga ágpamaké ka Manama. <sup>10</sup>Asal ukit katô kédu ka Manama kanak, igimuwa ikandin na apostoles. Madigár su duwán ágpulusán katô kédu ka Manama kanak, su tuuwa pa igággár-ággár ka tandingán katô langun ka duma mga apostoles. Asal tô iglumu ku ánnà ukit katô kanak bákkár, asal ukit katô tabang ka Manama na igbággé din kanak. <sup>11</sup>Purisu agad sakán ó tô duma mga apostoles tô mulit-ulit, magunawa tô Madigár Gulitán na inalayun gulit-ulitán katô langun dé, asta tô gó tô igbánnal yu.

### Manté puman tô mga ágpampamaké

<sup>12</sup>Na, su igulit-ulit dé ákniyu na inanté puman si Cristo, dì gó mému ka duwán tun ákniyu na kumagi na dì manté puman tô mga inaté!

<sup>13</sup>Atin ka ándà palang kantayan puman, ándà gó kanté puman si Cristo.

<sup>14</sup>Atin ka ándà kanté puman si Cristo, ándà ágpulusán katô kólít-ólít dé, asta ándà ágpulusán katô kapamaké yu. <sup>15</sup>Tuu pa madat, su bulaló tô igulit dé tingód katô iglumu ka Manama, su igkagi ké na iganté din puman si Cristo. Atin ka dì manté puman tô mga inaté, ánnà bánnal tô igulit-ulit dé. <sup>16</sup>Atin ka dì manté puman tô mga inaté, ándà gó kanté puman si Cristo. <sup>17</sup>Atin ka ándà kanté puman si Cristo, ándà ágpulusán katô kapamaké yu, asta ándà pa kapasinsiyayi tô mga salá yu. <sup>18</sup>Atin ka ándà kanté puman si Cristo, tô mga igpamaké ki Cristo na inaté dán, igdungguan dan dán ka supak ka Manama. <sup>19</sup>Atin ka sippang dád tun ta kamatayan ta duwán gimanan ta ukit katô kapamaké ta ki Cristo, sikita gó tô tuu makédu-édu ka tandingán katô langun manubù.

<sup>20</sup>Asal tô kabánnalan, inanté gó puman si Cristo, asta sikandin gó tô ágpasóddór na antén puman ka Manama tô mga inaté. <sup>21</sup>Ágkamaté gó tô mga

<sup>b</sup> 15:3 Ahaán tô Isaias 53:5-12

manubù ukit katô madat na iglumu katô sábbad manubù. Asal ukit pagsik katô madigár na iglumu katô ássa manubù, manté gó puman tó mga manubù. <sup>22</sup>Ágkamaté tó langun manubù su sikita tó mga kógpuwan i Adan. Iring pagsik kanan, antén puman tó langun ta na ágpamaké ukit katô kapasábbad ta tun ki Cristo. <sup>23</sup>Tó langun antén puman ka Manama tun ta timpo na taganà igsalin din. Si Cristo tó una gó inaté puman. Ka lumónód si Cristo, manté puman tó mga sakup i Cristo. <sup>24</sup>Ka matuman ni, dumunggu pa tó katapuriyan. Talun pa i Cristo tó langun ágpangulu, agad mga manubù ó agad mga madat espiritu, asta bággén din tó pagpangulu din tun ta Ámmà na Manama. <sup>25</sup>Kailangan mangulu pa si Cristo sippang ka talun din tó langun gusig kandin asta mánnal dan kandin. <sup>26</sup>Tó katapuriyan ka mga usig na iwaán asta andaán din, tó gó kamatayan. <sup>27</sup>Mà katô kagi ka Manama na igsulat,

“Igpasakup gó ka Manama tó langun tun ta pagpangulu i Cristo.”<sup>c</sup> Na, ukit kani kagi “langun,” isóddóran ta na tó Manama ándà gó kasakup tun ta mga panguluwan i Cristo, su Manama gó tó igpapangulu ki Cristo tun ta langun-langun. <sup>28</sup>Ka matuman na masakup tó langun tun ta pagpangulu din, pasakup pagsik tó Batà ka Manama tun ta pagpangulu katô Manama na igbággé katô langun tun kandin. Purisu mangulu gó tó Manama tun ta langun-langun.

<sup>29</sup>Na, ándin tó gugtunán katô mga manubù na ágpabunyag para katô mga inaté? Su atin ka di manté puman tó mga inaté, ándà ágpulusán katô kapabunyag para katô mga inaté. <sup>30</sup>Atin ka ándà kantayan, ándà ágpulusán dé agad inalayun ké ágdungguan katô mga pakamaté áknami. <sup>31</sup>Mga kataladi, bánnal na ágpapadurungán ku áknayu tó tingód katô kapasábbad ta tun ki Jesu-Cristo na Áglangngagán ta, asta bánnal gó na kada álló ágtubangán ku tó kamatayan tingód katô kapamaké ku kandin! <sup>32</sup>Ihirapanna gó tun ta Efeso, su tó mga manubù na gusig kanak, iring dan na magani mga mannanap ka kabánnássan. Purisu atin ka di manté puman tó mga inaté, ándà palang ágpulusán ku tingód katô katiis ku kani mga kahirapan. Atin ka di manté puman tó mga inaté, madigár pa ka tumanán tad baling ni ágkagin,

“Mému ka tumanán ta dád tó kakalyag ta na inalayun ki dád kuman asta minám, su masig kid maté.”<sup>d</sup>

<sup>33</sup>Asal yakó áglimbung katô áknayu sarili! Bánnal gó ni ágkagin, “Tó madat mga rarak yu makadadat katô madigár ágkémun yu.” <sup>34</sup>Piyai yu tó panámdám yu, asta sódó kó áglumu ka salà. Kailangan kayyaan kó su duwán tun áknayu na ándà ikasóddór katô Manama.

### **Tó lawa na antén puman ka Manama**

<sup>35</sup>Duwán tun áknayu na igsinà ka pamánnun ka Manama tó kanté din puman katô mga inaté, asta ándin é bónnóng katô lawa dan.

<sup>c</sup> 15:27 Salmo 8:6    <sup>d</sup> 15:32 Isaias 22:13

<sup>36</sup>Ágkatuluan gó tô manubù na iginsà! Panámdám yu tô bánni na ágpamulan. Ka di pa tumubù tô bánni, iring na maté asta lábbángngán. <sup>37</sup>Tô bánni na ágpamulan yu, agad trigo ó mga duma klasi, atin ka tumubù dán, ánnà magunawa tô bónnóng. <sup>38</sup>Manama tô ágsalin ka ándin tô lawa ka pamulanán na tumubù. Tô tagsábbad-sábbad klasi ka bánni duwán sarili lawa ka tumubù.

<sup>39</sup>Ánnà magunawa tô langun lawa na igimu ka Manama, su duwán lawa katô mga manubù, duwán lawa katô mga mannanap, duwán lawa katô mga manuk ta kayun, asta duwán lawa katô mga sáddà. <sup>40</sup>Ássa-ássa tô lawa katô mga ágkasállággan tun ta langit, asta ássa-ássa tô mga lawa na ágkitanán ta nit banuwa. Asal ánnà magunawa tô séllaán katô ágkasállággan ta tun ta langit asta tô séllaán katô mga lawa na ágkitanán ta nit banuwa. <sup>41</sup>Duwán séllaán katô álló, asta duwán séllaán katô bulan. Duwán séllaán katô mga karani, asta ánnà gó magunawa tô séllaán katô langun karani.

<sup>42</sup>Iring kanan tô imun katô Manama ka antén din puman tô mga lawa katô inaté manubù. Ni lawa ta ni ágkamaté asta ágkaróddóg. Asal tô lawa na antén puman ka Manama di gó maté ka ándà ágtamanán. <sup>43</sup>Atin ka lábbángngán ni lawa ta, malómét asta di madigár ágsállággán, asal ka antén ki puman, tô lawa ta masarig gó asta tuu madigár. <sup>44</sup>Tô lawa na lábbángngán, tô gó tô lawa ta nit banuwa, asal tô lawa ta na antén puman ka Manama, tô gó tô mantu lawa ta para tun ta langit.

Su duwán gó lawa ta nit banuwa, duwán pagsik lawa ta tun ta langit. <sup>45</sup>Su mà katô kagi ka Manama na igsulat,

“Tô una manubù na si Adan tô duwán dán kantayan.”<sup>e</sup>

Asal si Cristo na ágtawarán na “tapuri na Adan,” sikandin gó tô ágbággé ka mantu kantayan. <sup>46</sup>Ánnà ikóna tô mantu lawa tun ta langit, asal ikóna tô lawa ta nit banuwa, asta bullasan ni katô mantu lawa ta tun ta langit. <sup>47</sup>Tikud tun ta tanà tô una manubù na si Adan, su igimu ka Manama tô lawa din tikud tun ta tanà. Asal tikud tun ta langit tô “ikaduwa Adan” na si Cristo. <sup>48</sup>Tô mga lawa ta nit bówwó ka tanà iring gó na lawa katô una manubù na igimu tikud tun ta tanà. Asal sikita na mga ágpampamaké, tô mga lawa na bággén áknita tun ta langit iring gó na lawa i Cristo na igtikud tun ta langit. <sup>49</sup>Agad igimu ni lawa ta iring katô lawa i Adan na igtikud tun ta tanà, dumunggù gó tô álló na tô lawa ta méring pagsik ki Cristo na igtikud tun ta langit.

<sup>50</sup>Na, mga kataladi, kakalyag ku na kagpáttan yu ni. Ni mga lawa ta áknganni di gó masakup tun ta langit. Tô ágkamaté asta ágkaróddóg di gó makapanayun ka ándà ágtamanán.

<sup>51</sup>Paminág kól! su pasóddórán kud ákniyu tô kabánnalan na ándà pa pasóddóri ka Manama asal igpasóddór din dán kanak. Di maté tô langun ta,

<sup>e</sup> 15:45 Genesis 2:7

asal kabullasan tô lawa katô langun ta. <sup>52</sup>Matuman ni iring dád na sábbad kaparák-parák ka mata. Atin ka pédupán tô trumpeta ka Manama ébô pasóddór na igdunggù dán tô katapuriyan álló, antén puman ka Manama tô mga inaté. Bullasan gó ni lawa ta asta di kid gó maté ka ándá ágtamanán. <sup>53</sup>Su ni lawa ta na maróddóg asta maté kailangan bullasan katô lawa na di dán maróddóg asta di dán maté. <sup>54</sup>Purisu ni lawa ta na ágkaróddóg kabullasan gó katô di ágkaróddóg, asta ni lawa ta na maté kabullasan gó katô di maté. Ka matuman dán ni, matuman tô igtandô ka Manama na igsulat,

“Andaán ka Manama tô kamatayan su talun din tô langun-langun!”<sup>f</sup>

<sup>55</sup> “Matalu gó tô kamatayan, asta di gó makadadat.”<sup>g</sup>

<sup>56</sup>Ágkadungguan ki ka kamatayan su ikasalà ki, asta ikasalà ki su ándá ki ikatuman katô mga sugù i Moises. <sup>57</sup>Asal pasalamat ki katô Manama, su ukit katô iglumu katô Áglangngagán ta na si Jesu-Cristo, duwán dán kapanaluwan ta kani langun.

<sup>58</sup>Purisu mga kataladi ku na ágginawaan ku, pasarig kó. Yakó ágkapid tikud tun ta kabánnalan. Pabákkár kó ágtuman katô ágpalumun ka Áglangngagán ákniyu, su isóddóran yu na duwán gó ágpulusán yu tingód katô áglumun yu para katô Áglangngagán.

#### Igtabang dan katô mga ágpampamaké tun ta Judea

**16** <sup>1</sup>Na, tingód katô tabang yu katô mga ágpampamaké tun ta Judea, kailangan lumun yu pagsik tô igpalumu ku tun ta mga ágpampamaké tun ta Galacia. <sup>2</sup>Kada Linggo, taguán katô tagsábbad-sábbad ákniyu tô bahin ka sweldo yu ébô duwán bággén yu. Limud yu ni ébô ka dumunggù a diyan ákniyu mataganà dán tô tabang yu. <sup>3</sup>Salin yu tô mga manubù na mid katô tabang yu tun ta Jerusalem. Atin ka madunna tun ákniyu, pasadunán ku sikandan tun ta Jerusalem ébô piddán dan tô tabang yu asta tô surat yu na bánnal ágkasarigan dan. <sup>4</sup>Atin ka kailangan madunna pagsik tun ta Jerusalem, mákkás dan kanak.

#### Plano i Pablo

<sup>5</sup>Tô plano ku, mukitta tun ta Macedonia, asta tikud dutun mallussa diyan ákniyu. <sup>6</sup>Iring gó na madugéya diyan ákniyu, su móddô a basi róggun na magánnó tô timpo. Atin ka matuman, katabanganna ikiyu katô mga ágkailanganán ku ka manayunna tun ta sadunan ku. <sup>7</sup>Diya malyag ka dógowa dád diyan ákniyu, su kakalyag ku na madugéya pa diyan ákniyu, ka mému tun ta Áglangngagán.

<sup>8</sup>Asal móddô a pa kannun ta Efeso sippang katô álló ka Pentecostes. <sup>9</sup>Marapung pa tô maminág pád katô ágtinuruán ku, asta panámdám ku na marapung pa tô mamaké, agad marapung tô mga gélé.

<sup>f</sup> 15:54 Isaias 25:8    <sup>g</sup> 15:55 Hoseas 13:14

<sup>10</sup>Ka dumunggù si Timoteo diyan ákniyu, dóppóni yu sikandin ébô di ágkamáddangan, su sikandin tô ágsuguánán katô Áglangngagán, iring kanak. <sup>11</sup>Yakó géllé ágtanggap kandin. Ka panó sikandin tikud diyan ákniyu, tabangi yu sikandin tingód katô mga ágkailanganán din ébô masuné tô ginawa din ka lumónód dini kanak. Angatan ku sikandin asta tô duma mga kataladi.

<sup>12</sup>Na, tingód katô kataladi ta na si Apolos, igpédu-éduwa gó kandin ébô madun tun ákniyu na mákkás katô duma mga ágpampamaké, asal di pa kun sikandin makasadun áknganni. Madun gó sikandin ka duwán dán madigár timpo.

### Katapuriyan mga panalan

<sup>13</sup>Na, banté kó. Pasarig kó katô kapamaké yu ki Jesu-Cristo. Yakó ágmataló, asal pabákkár kó. <sup>14</sup>Agad ándin tô áglumun yu, lumu yu na duwán dakál ginawa.

<sup>15</sup>Isóddóran yu na si Estefanas asta tô pamilya din tô una igpamaké diyan ta ákniyu probinsya ka Grecia. Malóggód dan ágtabang katô mga sakup ka Manama. Na, mga kataladi, ágpédu-éduwa ákniyu. <sup>16</sup>Pasakup kó gó tun ta mga manubù iring kandan asta tun ta langun katô duma mga manubù na ágtabang.

<sup>17</sup>Idayawanna gó su igdunggù dán si Estefanas, si Fortunato, asta si Acaico, su agad ándà kó dini, asal sikandan tô bullas ákniyu, <sup>18</sup>su igórór dan kanak iring katô kórór dan ákniyu. Kailangan pabantugán ta tô mga manubù iring kandan.

<sup>19</sup>Ágpangumusta ákniyu tô mga ágpampamaké nit probinsya ka Asia. Si Aquilas, si Priscila, asta tô mga ágpampamaké na ágpalimudé tun ta balé dan, ágpangumusta dan ákniyu su igpasábbadé tô langun yu na igpamaké katô Áglangngagán. <sup>20</sup>Ágpangumusta ákniyu tô langun kataladi ta dini.

Papangumustaé kó langun na ágpampamaké ágtákkásan katô kapaginawaé yu.

<sup>21</sup>Na, sakán si Pablo tô igsulat kani. Kumusta kó langun.

<sup>22</sup>Supakan gó tô langun na ándà ginawa tun ta Áglangngagán. Áglangngagán dé, lónód kad!

<sup>23</sup>Mólà pa ka tô Áglangngagán na si Jesus kéduwan ákniyu.

<sup>24</sup>Ágginawaan ku tô langun yu na ágpamaké ki Jesu-Cristo. Matuman ni.